

四庫全書

集部

欽定四庫全書

集部

華陽集卷三十三  
六

詳校官庶吉士臣瑚圖禮

主事臣呂雲棟覆勘

總校官編修臣王燕緒

校對官主事臣陳文樞

謄錄監生臣宋學濂

欽定四庫全書

華陽集卷三十三

宋 張綱 撰

雜文

異鶴記

神僊之說尚矣世人以其事不常有而莫之信夫事不常有而一旦出於耳目之所接殆非人力能致則傳說所載有不得不信者某舅氏左朝散郎提舉江州太平興國宮李公某之夫人胡氏紹興二十年十二月癸卯

以疾卒越二十日公用道家法為夫人薦冥福于茅山之元符萬寧宮方至山欲登殿有羣鶴不知所來向殿飛舞少焉一鶴繼至合十有四徘徊上下食頃乃去又四十九日當明年二月庚戌夫人既葬復有鶴翔於公所居第廳事之前如元符所見之數其一亦後至去地三丈許兩兩成列凝然不動若俯若仰其勢各殊日光射之輝彩眩目鄉人爭覩為快稍喧忽盤旋作西北向去未數十步有白雲千餘族從後湧起飄回鶴所如銀

山雪浪鶴舞其中元裳縞衣或現或隱良久雲合不見  
觀者歎仰咸謂夫人僊去今日乘鶴來歸嗚呼異哉夫  
人孝事舅姑克盡婦道舅沒姑且老奉養尤謹食飲衣  
服必躬必親調芼之不精澣濯紉縫有所未善必反復  
之可其意乃敢以進姑有疾卧起以夜繼日倦即坐而  
假寐如是者兩月體瘦至骨立顛沛不少懈人皆稱為  
孝婦居家雍睦忍辱無事處心仁慈重殺物命媵侍有  
過曉譬之不見責怒里族有貧不給者隨所有以施予

無嗇意嘗謂日用之物生於天地而人力成之不敢妄費至若盥濯之水亦不過量方感疾夢一道士揖之使前寤而曰吾其逝矣是夕奄然而化四日而後歛體柔膚澤容色如生目瞑而光不毀溢出睫間數道如線又左額髮際有物如金珠浮動半日家人以手掬之輒失去蓋夫人平生為善出於天性雖大修行人有所不及而孝行尤著宜其卒也有異於人矣古之得道者多尸解僊去而或謂鶴為僊人騏驎蘇耽丁令威之徒去而

復歸皆從以鶴以所見乎今考所聞乎古是邪非邪不可得而知也姑摭其實以紀大略云

書刁倪老挂劍帖後

刁倪老行年七十有五而氣貌不衰出入起居如少壯一日携八座胡公挂劍帖來示余曰吾老矣嘗預作死計求挽詩於胡乃得此他日吾有不諱胡以詩來即瞑矣余竊怪之曰輓詩所以寫哀特為死者作也公方矍鑠示人意象未肯服老何忽須是不祥莫大焉公曰然

寓形宇內百年一瞬人苦不自悟也今吾幸有田疇足以給衣食有詩書足以遺子孫結廬數椽青山相對翛然終日家自釀酒不問美惡客來輒醉自謂如此已足了一生尚何求獨送死一段正須料理念於胡有葭蓼親知我平生莫胡詳也吾故欲其有作以慰地下嘗見陶淵明既述五柳傳又作文以自祭白樂天亦傳醉吟本末而自銘其墓二公皆前世賢者猶汲汲於身後老夫不能文也求詩於人以待盡雖愧陶白不猶愈於貪



生而忘死者乎余三復斯言然後知公為達因語公曰  
公壽骨高當享期頤誰能為公移書以謝季子寶劍誠  
大惠也欲挂在二十年外且請洗削藏之母以迫人公  
大笑因命書於帖後

恭題賜帶御書

臣仰惟皇帝陛下總攬權綱慨然念治登進羣彥中外  
布列而尤惠顧近輔以禮終始之迺紹興二十有七年  
九月辛未以臣上章引疾乞罷參知政事奉外祠詔勿

許懇請數四特除資政殿學士知婺州辛巳既臨遣又  
敕中使馳至江亭賜臣御書一封通犀帶一條以寵其  
行臣自初有請凡三對便坐愚衷委曲盡荷聖知慰諭  
憫憐恩禮已極敢意非常之賜復此下逮跪捧慚懼莫  
知所措因竊自念材力駑下得謝久矣一旦蒙召用再  
忝從班不閱歲遂參國論任益重報効益無聞加病且  
老分當擯棄尚何足惜而於其去也乃軫皇慈念及衣  
服之微而假以異數如此非獨臣拜寵若驚一時觀瞻

駭歎亦謂比年所未有也嘗聞周宣王之遣申伯則以  
路車乘馬命韓侯則以淑旂綏章蓋侯伯分土而守天  
子思所以大鎮撫之於是乎有賜然二賢之美特託詩  
人以傳後至若人主親御翰墨發為奎章錫命自天昭  
示隆眷則以今視昔萬萬有光焉夫宣王能慎微接下  
故其臣無不自盡以奉其上臣謬列侯爵守茲南邦膺  
受渥澤庶幾跂望古人惟是德不足而榮過過之大懼  
勿克欽承以隕越於下區區自盡之忠其敢忽忘既襲

藏寶帶傳示不朽復以宸翰恭勒堅珉不唯繼二詩以侈上恩抑將使學士大夫知君父所以待遇臣子之意各思自勉云

題祖誥

某自卯角聞先祖少傅言家舊有唐朝告勅數卷三張族長主之今不知安在蓋張氏本河朔人有仕唐官於潤者因家金壇分派而居張橋赤岡希墟各為一族歷年既久張橋赤岡失其世次唯希墟家譜見于石刻自

先考太師而上七世諱璆者為希墟始祖合前二族號  
三張家其間世次既難盡考亦莫知族長為誰以故祖  
誥藏匿不出紹興四年某自給事中罷歸暇時集宗黨  
諭意密令搜訪又數年始得之乃上柱國銑揚州六合  
縣主簿連制書二通幅縫舛脫字多漫滅至有零落壞  
甚不可識讀則去之而取其可以編次者命工裝為一  
卷題曰張氏唐朝制書唐人善筆札觀此書墨跡一一  
可愛又郭尚父李司空賈元靖皆元勳重望而蘓顧奚

徐亦一時勝流列名其上自乾元至今傳四百餘年開  
卷一讀如見乎其人竦然生敬開寶初南唐違命侯猶  
未歸朝方欲調兵旅拒而遠祖嘗以衣冠戶攜是書免  
充軍名卷末有二徐署銜即鉉錯兄弟也舊云三通一  
十七縫今亡三之一又寶應貞元年號以脫縫先後不  
倫而二徐書押亦無復見皆為可惜嗚呼張氏衣冠其  
來舊矣二祖在唐雖以官微事業無所見然其流芳餘  
澤傳及後人已墜而復振則當時慶源所積可不論而

知矣某老病豈能久生恐來世不知宗姓本始故特為  
題識凡我子孫宜謹藏之

跋洛神賦摹本

曹子建賦洛神正如說夢虎頭癡絕遂以為畫本僧步  
隆又從而摹之人物態度恍如目擊是邪非邪著想顛  
倒以見世間種種虛幻像法莊嚴便為實相有能悟解  
諸法海一切應作如是觀

跋醉道士圖

被褐撲藪不受戒杯盤狼藉無籍在浪說蓬萊三萬里  
醉鄉便是僂世界

跋江貫道畫山水

老江畫山水造微入妙一時好事者訪求遺墨幾與隋  
珠趙璧爭價不知明仲安所得此宜善藏之無使通靈  
之物變化而去

二

胸中丘壑發之毫素居然有萬里勢間牕永日鳴琴對



之便覺衆山皆響

跋洪慶善先夫人丁氏詩文手墨

夫人賢而有文蓋得於慶善所作誌銘舊矣今又見此遺篇字畫勁麗詞致清婉使人三復竦然余雖媿家不及一拜堂上然風味不凡自可想見仰知誌銘為實錄也

跋丁氏手簡并剛巽詩卷

剛巽頃任國子監丞余官太學相從甚久為人純篤雅

重有前輩典型今即世不知幾年一見遺墨恍如對面  
愴然久之又得其女慶善先夫人所寄女弟手帖真草  
累幅皆閨房箴訓情致纏綿若不能自己者以是知夫  
人篤於恩義盖有似其先人云

跋張叔元藏山谷覺民帖

山谷勸其弟姪讀書一帖中三致意焉丁寧懇切唯恐  
其或怠盖非獨私其弟姪而已凡厥後學皆當敬佩斯  
言永以為訓

跋山谷大字

能鼓琴者識琴能擊劍者識劍故必能書然後知古人筆法叔元出示豫章公墨蹟一卷余手拙不能書何足以識之但見其行草變態縱橫勢若飛動而風韻尤勝非得夫翰墨三昧其孰能臻此公嘗謂蓄書者以韻觀之當得其彷彿今反復此帖知公言為確論

跋寶晉帖

余家舊有米帖數卷兵火中失之其間一紙叙京口江

山形勝為最奇特或謂有瘞鶴銘苗裔今觀此書筆勢  
雄强大似京口帖使人對之恍然念青檀不忘也

擬進御試策題

朕紹開中興夙夜求治有年於茲而道未方古固知攸  
濟乃慨然興念視前日之政有不便於時者若小若大  
咸飭而正之於是拔滯淹放姦回而收人材之用削繁  
文遵舊典以清法令之原懼刑罰之寃濫則許其昭雪  
使之自新憂財用之耗蠹則蠲其羨餘為之節省以至

嚴取士之科而惠實學頒求言之詔以通下情內則選  
命臺諫開公正之路大肅朝綱外則慎擇牧守奉寬恤  
之政亟紓民力是數者皆方今之要務斷自朕志次第  
舉行冀有以合天下之公而庶幾乎先王之盛夫唐虞  
成周號稱極治而其書具存有國者所當法也以今日  
之所為驗之於其書尚慮講究之未詳推行而未盡子  
大夫強學待問其為朕熟之究之伊欲祖述憲章悉其  
條貫使先王之治復見於斯世必有可言者詳著於篇

朕將虛心以聽焉

婺州勸農文

仰惟明天子念稼穡艱難躬耕以先天下而詔至郡國  
又每以勸農為首德至渥也夫體上德意奉行詔令實  
太守之職方時東作田事既飭是用率僚屬入阡陌攜  
酒與肴招父老而飲食之且告之曰力田為生之本汝  
所當知情媮自安越其固有黍稷宜各率乃子弟痔乃  
錢鏹以朝夕從事毋忽異時高廩萬億於此乎取之是

豈獨富於家以不負其力抑將使太守涉筆占位書勸  
農之職為無愧云

洪宅求婚書

長子堂  
繼娶

夙欽門閥謬忝鄉鄰頃幸接於台光既叙葭莩之舊茲  
用忘其寒族具存孌婉之求竊以某人粗謹過庭久虛  
中饋伏承某人騰芳甚早擇對維時敢因媒妁之言願  
合婚姻之好委禽效贄顧篚實之不豐鳴鳳再占尚蓬  
門之有耀儻納愚悃恭聽嘉音

丁宅求婚書

次子  
堅

序人倫之本禮莫重於成婚敦世睦之情義敢忘於求  
舊以某人方逾幼學行卜好速伏承某人秀發閨房譽  
宜家室輒藉行媒之吉用申合姓之誠齊鄭相親顧雖  
慚於非偶潘楊有自諒無替於前修即俟嘉音永以為  
好

丁宅納幣書

婚媾以及時為貴詩每戒於三星男女非受幣不親禮



必先於五兩惟某頃歲有請行媒幸既冠以成人宜納  
徵而授室實茲筐篚用陳不腆之儀恃有葭莩尚監未  
將之敬其如冒浼徒積兢慚

答丁宅求婚書

大婚為萬世之嗣具載格言納采居六禮之先遽承華  
翰惟令姪孫學已親於師友而小孫女教未習於組紉  
念結褵而願為有家固先求舊况許嫁而言猶在耳敢  
背厥初聞命以還懼悚曷既

朱宅求婚書

三孫  
鑒

合婚為重敢攀閥閱之宗同氣相求願附葭莩之末小  
孫登仕郎某粗服膺於古訓幸及齒于成人伏承令女  
某人慶分相葉之光德茂公宮之教輒憑媒氏仰締華  
姻圭竦家風雖自慚於非偶金蘭世契諒無阻於好逑  
上瀆高明佇聆嘉命

答錢宅求婚書

長子  
孫女

大婚為重且載格言同氣相求遽承謙誨伏審令長孫

承務稟天材而粹美紹家學之淵源而某孫女某人教  
方習於組紉職未勝於灑掃既辱行媒之諭克協鳳占  
輒忘家世之平謬希蘿附欽聞嘉命倍切欣悰

答錢宅請期書

女子願為之有家已奉通婚之約吉事卜先於近日遽  
聞親迎之期雖告虔之贄未修而傳命之郵遠逮欲辭  
不可為愧徒深

曹宅求婚書

四孫  
鑄

鄰邦相望夙欽閱閱之高二姓同婚願卜絲蘿之好雖  
慚非偶蓋喜同聲伏承令姪女某人傳慶大家已深明  
於女誠而某第四孫通仕郎某誦書黃石私竊慕於祖  
風既賞緣媿姪之有初且考驗蒼龜而協吉匪媒不得  
先馳尺素之誠其新孔嘉佇俟千金之諾

道士王如晦真贊

色如春溫若可與言神如水清不可以煩子喬僊去遠  
矣乃今識其裔孫任造化之日逝獨湛然而常存

二

道風僂骨照青春誰寫生綃却亂真莫訝三毛不加頰  
齊公端解視全人

道士李冲妙真贊

蟠根僂李萬葉敷遺芳豈直黃冠徒吐氣硤砢古丈夫  
味道之腴貌何癯誰令畏壘俎豆予龍吟虎嘯人爭趨  
故棲猿鶴情未踈翻然脫屣吾歸歟舍者爭席不闕渠  
向來形諜誠區區

二

領袖名山龍吟虎嘯忽辭屨於戶外信光矣而不耀是  
將冲而用之深入乎衆妙之門吾不知其人曰伯陽之  
孫

自贊寫真

堂堂莫作公侯想是身如幻無定相衣冠挂却神武門  
便是維摩坐方丈

二

投閑歲久聖恩圖舊載錫身章在帝左右骨相多屯何  
以瘡人陳力就列勿為具臣

華陽集卷三十三



欽定四庫全書

華陽集卷三十四

宋 張綱 撰

詩

聞車駕幸秘府二首

一聲清蹕九天來  
睿主崇文寶運開  
光動石渠春泂漾  
香浮芸閣晝徘徊  
天顏有喜垂清問  
御筆親題仰聖才  
鉛槧小臣空悵望  
五雲深處認蓬萊

春旗簇仗石渠邊  
東壁分明帝座前  
八品微官恩有地

七年通籍願瞻天心馳魏闕何時到身滯周南祇自憐  
遙想道山雲集處幾多光寵被羣賢

次韻王子飛跋石曼卿洛中題壁

酒狂翫世芙蓉僂骨中落落太古全浮雲富貴不著眼  
肯復騰上誇鳶肩應怪元龍負豪氣獻書天子言十事  
騎驟一去不可追風月淒涼壁間字

九日陳少陽同戴國衡王虞章游天清寺菊坡  
不蒙踐約次韻少陽

太丘道廣固難周自有良朋結勝游莫使彈琴防性氣  
只堪尋竹占清幽三篇解索詩償債一醉那無酒喚愁  
貧甚淵明在環堵忍教空負菊花秋

次韻國衡

古寺憑崇罔蒼烟蔭喬木欹斜屋鱗比繚繞牆帶東何  
人闕層軒延客寄遐矚醉賞菊坡下客意豈在菊念昔  
居此地名世盡儒服師曠賢多知蒼史聖重目臺成竟  
誰游事去不容躅梁王高帝孫名字亦不辱當時盛歌

舞肯使後人逐陳跡今故存新池為誰綠感歎世上事  
反覆如轉燭請君聽鍾魚尚想吹紫玉

次韻虞章

軌道無停轍楓林難盡柯人生百年間疾若下走坡何  
為行役苦况乃憂患多淵明頗解事舍濁揚清波九原  
骨已朽萬古名不磨念我獨窘束處世隨唯阿塵埃眼  
中滿歲月馬上過不作鷄肋棄尚扣牛角歌正賴良友  
朋詩句陶天和涓涓吐微溜浩浩供洪河三篇怯大手

未陳先倒戈借問菊坡游頗亦狂醉麼獨不飲公榮冷  
面看紅酡欲賦無好語書懷愧陰何

書懷

紛紛兒輩謾同時獨負權竒不受羈刻燭已驚詩句逸  
飛觴肯放酒行遲平生白壁休三歎萬事黃梁僅一炊  
誰向先賢得風致空令人笑虎頭癡

夜飲二首

大木千章難近用朱絃三歎有遺音微言欲扣會心處

濁酒不妨隨意斟

年少詩狂不自禁  
那堪客裏聽孤砧  
寒夜半月初上  
酒盡欲眠愁更深

戲張處文二首

禪房深夜雨蕭蕭  
只有青燈伴寂寥  
咫尺嬋娟鎖朱戶  
不知何日枉佳招

延賓北海坐常滿  
不飲公榮亦太慳  
病渴固應難與酒  
嘯歌元自不相關

春末桃李盛開竹間有梅一枝疑然秀發用唐  
子西韻簡汪彥章

在處朱朱魚白白化工伎倆真多色誰知先生鐵石心  
到眼物華如過客高標可但凌三冬一枝傑出妖艷中  
椒蘭絳灌信鼎貴萬世屈賈留清風

館職上元宴集葆真宮以病不赴次龔濟之韻  
春融準擬千場醉底事年來興易厭滿眼笙歌招不出  
獨哦詩句遶窮簷

鄭樞密生日五首

黃閣曾居百辟尊，經綸相業滿乾坤。  
化行風雨年年節，恩到桑麻處處村。  
付與斗樞深拱極，安排鼎鉉再調元。  
贊襄好為蒼生計，天子文思納盡言。

朝來佳氣滿樞庭，知是君王用老成。  
素倚房喬闕大事，政須裴度張威名。  
三千奏上深憂國，百萬功成看偃兵。  
聽取啼禽催布穀，便將霖雨發春耕。

衮衣廊廟孰推先，元老勲名自卓然。  
忠概明堂尊一柱，



神鋒長劍倚中天定知闢國功歸召已見疏封地得燕  
相業蟬聯應未艾少翁家學似韋賢

此日君恩特地深傳呼星使自天臨鸞臺鳳閣滿春色  
燕語鶯啼俱好音駿極共歌申降嶽對揚真賴傳為霖  
青氈豈待金甌卜自有公言格帝心

推轂當時起陸沈巴渝祇恐累知音十年謬許門人列  
一報長懷國士心沙路待看新築穩桃陰應念舊蹊深  
酸寒尚有男兒志忍使霜華兩鬢侵

代人上鄭相生日三首

瑞霧祥烟滿絳霄  
詔開黃閣宴生朝  
鈞天合奏御香滿  
百辟紫宸初散朝  
流花寶爵傳宣勸  
歡聲自逐和風轉  
四方爭獻壽星圖  
祝公千歲身長健  
畫手丹青妙入神  
煌煌列宿能寫真  
貂冠玉帶畫中見  
便是凌烟閣上人  
偉哉風骨神僊裔  
主張壽祿來塵世  
不須更占南極星  
看取老人朝玉帝

右壽星



--	--	--	--	--	--	--	--	--

秋日野望

秋雲來不斷野色浩無窮興逸煩襟外詩成醉眼中懷  
鄉看宿鳥轉物悟飛蓬何日江南去新鱸鱠筋紅

謝洪察院送酒

嗜酒劉伶絕世無春衫典盡到天壺造門誰為傾家釀  
見客常留滿眼沾頗訝霜威太嚴令忽分春色到焦枯  
一尊且作通宵醉明日重看朝夕烏

次韻陳去非中秋無月

蕭色中宵雨打牕那知風月亂飄黃已無佳月供清賞  
賴有新詩耿夜光蓬戶我方甘寂寞朱門君勿看輝煌  
只今天柱峰何在好約玄真一醉狂

送杜子從赴成都倅

結束征鞍去欲奔  
行行折柳送都門  
壯懷未用看雙鬢  
祖席何妨醉一尊  
玉局僂遊成獨往  
草堂詩句與誰論  
懸知別乘風流處  
醉倚紅粧笑語溫

友人哭內作詩次韻

奉倩傷情愛所鍾  
佳人難在豈天窮  
登臺曾是吹簫侶  
對影今為舞鏡雄  
虛案故應愁午飯  
小牕誰與伴春風  
夜深它帳遙聞語  
莫怨朝來無是公

戲題所見

破睡輕風透碧紗  
寶釵聊插任歌斜  
欲尋女伴嬉遊去  
試問鞦韆有幾家

候張彥智承出

縈蛇路轉愜登臨  
一室翛然客靜心  
杖履主人山下去  
風鳴岩壑自幽深

用前韻索彥智和詩

老將詩壇數按臨  
詞鋒疑有受降心  
夜嚴旗鼓吾將勉  
只恐秦師壁已深



彦智贈汧泉一斗使僕淬礪斤斧出長松矯矯  
之姿甚大惠也因成小詩寄謝昔李太白作詩  
三千首自謂不直一杯水今詩四句耳較之不  
直涓滴乃欲酬一斗之贈無乃太鮮乎

累累弱蔓繞長松未放蒼龍舞太空賴有霜刀堪一割  
謝公汧水為磨礮

喜門客至

簷桶縱橫僅滿筵維摩病室故蕭然焚香靜掃床前地

宴坐超觀物外天容  
滕不妨元亮醉下帷  
誰識仲舒賢  
白頭千里來相就  
知是吾兒幾世緣

讀周仲弼雪中友人過訪詩次其韻

騎馬走天闕  
著破幾狐裘  
功名藐未涯  
日月去不留  
從來古本強  
游談愧枚鄒  
閉門有樂地  
未用兒女憂  
故人寄新詩  
卷軸紅牙頭  
飄然雪中作  
乘興將誰謀  
相與情未疎  
連夜飛輕舟  
此身一縷微  
豈待萬戶侯  
有酒且共樂  
貧交乃勝游

次韻仲弼重九

黃花白酒兩相逢把酒簪花對晚風  
千里故園雲水外三年歸路夢魂中  
自憐晚晚傷秋色誰解踈狂發醉紅  
寄語髯周頗知否此時情緒與君同

送姪合赴省試三首

破的雄鄉國擔簦上帝京  
路夷驤逸驥天濶轉飛鯨  
學就千人敵名歸四海爭  
莫言年少在歲月易崢嶸

黃卷新儒業青錢舊世家  
征衣輕遠別祖席倍歡譁  
雲

薄堯天近山昏楚日斜高堂朝夕念擢桂是生涯

聖主收羣策終軍正妙年精神揮玉雪翰墨灑雲烟舊  
學嗟予老衰宗繼汝賢決科須第一慎勿棄青氈

華陽集卷三十四

欽定四庫全書

華陽集卷三十五

宋 張綱 撰

詩

次韻蘇養直破虜謠

旌旗千里照江紅  
學語小兒爭挽弓  
春風江岸草無際  
馬蹄踏徧青茸茸  
將軍面作石稜紫  
百萬強兵陣前死  
游魂假息度長江  
京觀應慚望西滸  
蘇侯筆力壯三軍  
破虜長謠入眼驚  
何當更獻中興頌  
坐看萬國朝神京

次韻仲弼

高卧元龍百尺樓，飽看風月自忘憂。  
雖無濁酒招陶令，尚有枯棋伴奕秋。  
俗事可堪遮眼底，愁情終莫上眉頭。  
襟懷落落誰能測，方寸端容萬斛舟。

千里長懷北固樓，客居顏巷不堪憂。  
清熒坐看孤燈夜，搖落初驚一葉秋。  
已厭清談揮麈尾，誰能細字寫蠅頭。  
尊鱸固是吾家味，好約西風買釣舟。

次韻李傳道感事

卧病何人為掃門  
墮霜黃葉任繽紛  
旋沽濁酒難禁醉  
厭數孤砧遠更聞  
冉冉生涯飄似夢  
悠悠心緒亂如雲  
幾時得遂江湖去  
野性終隨鷗鷺羣

聞官軍掩殺城中羣寇次傳道韻

未復錢塘郡  
先收鐵瓮城  
妖星隨月落  
殺氣逐參橫  
已築鯨鯢觀  
重新鼓角聲  
大江應好在  
流恨幾時平

飲散

懶性時難合  
愁腸酒易醺  
雨聲牕外過  
客語夢中聞  
借

問安邦策誰堪破賊羣可憐吾老矣生意薄如雲

聞鎮江賊平

賊隨寬詔免恩浹大江浮人少餘新市城荒剝古丘瘡  
瘼誰共理宵旰獨深憂莫上西樓望黃雲滿眼愁

次韻彥智夜歸三首

餘年知有幾時過如激箭况乃世味惡酸辛幾嘗偏朝  
來忽覽鏡坐嘆華髮變故人尚青眼危論排月且慰我  
出新詩驪珠有餘燦



國步何多艱戎虜尚傳箭萬里眇寰海瀕洞風塵徧其  
間蟣虱臣亦作豺狼變中興賴明主掃除在一旦憑君  
深夜望已失妖星燦

扁舟連夜發歸興急如箭喪亂男女悲一息萬慮徧人  
生豈匏繫事業有豹變聖王纂洪業廟堂用伊旦拔茅  
到公等王道何其燦

次韻蘇晉翁見寄

不見梁王舊吹臺年來愁眼向誰開求賢廊廟無虛日

報國消塵自乏才，直指漫能迎柵具。  
永懷寧敢咏金罍，相看鬢髮霜千丈。  
自視文章水一杯，晚歲可憐神氣索。  
故人欲寄好詩來，追還正始真堪喜。  
突過黃初豈易陪，婉孌也知能度曲。  
葡萄應已釀新醅，何時東閣容鷺坐。  
一日那辭一百迴。

傷春

老來心事不禁春，風物相撩入眼新。  
苦索吟哦成底急，且休拘束認吾真。  
有錢買酒須饒醉，無事看山莫厭頻。

憂國只今夔契在應容衰疾伴樵人

用前韻送春

滿眼鶯花自在春送春情緒怯愁新鼓琴不用戴安道  
行酒怯須溫太真晚歲深交能有幾相逢爛醉莫辭頻  
新條更有明年在重與東風作主人

次韻傳道夜觀牡丹

年來春事不相關一笑除非醉裏拚未信花枝憎白髮  
且隨月色傍朱欄他時拜賜猶能記

百官遊金明池  
館職賜牡丹此

夜傷心更忍看姚魏風流渾謾與坐來雙泪落金盤

七月晦

七月忽逢晦悲秋竟若何破羌無妙畧中聖有狂歌  
世味羞嘗鼎心源欲靜波由來麋鹿性幽興滿烟莎

歸鄉

窮巷歸來已白頭結茅何必榜休休好山當戶碧雲晚  
明月滿谿寒葦秋詩社縱添新句法醉鄉難覓舊交遊  
平生幸自無機械一棹夷由去狎鷗

用前韻

愁來莫遣上眉頭著酒驅除醉即休未省一官堪送老  
已驚雙鬢不禁秋  
收心香火供清夢洗眼雲溪結勝遊  
喚取短篷乘晚興坐看烟浪沒輕鷗

對月

蓬鬢秋風老柴門轍跡踈誰同今夜月望絕故人書止  
酒愁元亮何心賦子虛得詩還喜誦習氣未全除

避寇艤舟遇雪

西山羣盜欲侵凌  
小艇移家傍險行  
遮眼亂雲方合沓  
向人飛雪忽縱橫  
心憂出穴虎狼近  
身似遶枝烏鵲驚  
天濶此時難借問  
地偏何處可偷生

用前韻

雪花吹面凍凌凌  
客路艱危敢緩行  
春酒可賒三日近  
野梅初見一枝橫  
傷時在處愁先滿  
討賊無期夢自驚  
誰解東山問消息  
謝公應起為蒼生

泊舟廟灣次姪合

泊舟高岸曲散步小村傍盜賊耳邊滿朝廷天際望繫  
愁官柳嫩醒醉野梅香後進推吾子詞鋒不可當

春耕

亂後荒田杞棘生歸來還喜見春耕隨犁細雨濛濛濕  
轉壟新泉咕咕鳴好勸賣刀添健犢盡令長畝種香秔  
腐儒一飽真餘事莫遣閭閻有歎聲

次韻黃堯翁鬪鷄三首

宴罷金雞列籠瞻黼座遙兩雄爭定霸一戰息虛憍忍

受推冠辱貪承賜錦饒如何紀涓氏今乃混漁樵

繫馬翠樓下鬪鷄花樹傍飛毛驚辟易喋血壯摧傷奮  
擊方乘勢歡呼忽擅場忿心能幾許嗟爾太匆忙

約鬪提籠出無譁倚壁看禍心藏芥羽碎首濕朱冠擒  
敵壯夫事策勲公子歡棲羣噲等伍今日始知韓

次韻頌應文

萬事浮雲過眼空羞將白髮競春紅折腰久已慚元亮  
作賦何勞慕敬通經世豈無天下士知心應有古人同



破除孤憤難忘酒聖處時時且一中

讀書

卻老慚無術驅愁賴有書披尋窮浩渺領畧造玄虛  
日三竿靜爐薰一炷餘倦來還自哂蠹簡類蟬魚

次韻孫仲益食豚魚

說食書生費口牙一杯初捧白瓷花  
晨鳧夜鯉可已命  
早韭晚菘同世家毒甚鎖鑰渾謾語  
詩成珠玉且雄誇  
腐儒一飽忘粗糲更索盧仝七椀茶

次韻應文遊東園

筋力摧頽老自知，追歡猶學少年時。  
園林勝處看如夢，杖履行來步懶移。  
對酒不堪蕉葉滿，插花那復帽簷欹。  
羨君詩句方豪甚，應笑踈狂亦強隨。

次韻李道士觀南山三首

濛濛烟雨忽晴開，坐覺羣山爽氣來。  
誰向此間尋賀老，相逢莫放酒船回。

山似圍屏六曲開，小溪如帶傍山來。  
結廬谿北對山住。

俗駕何妨且勒回

柴門無事晝慵開  
杖履誰曾得得來  
隔岸野花隨處發  
護巢幽鳥傍林回

與韓子蒼別久忽邂逅於臨川  
遭時亂離道舊感歎子蒼有詩見贈次韻奉呈二首

三顧當年尚草廬  
南陽誰識卧龍居  
舍人自是出世佛  
學子猶呼行秘書  
視草似聞虛翰苑  
追鋒看即近郊墟  
論思好為蒼生計  
莫學辛毗謾引裾

隨緣到處是吾廬  
風雨飄飄敢定居  
異縣逢君如隔世  
七年怪我苦無書  
平生出處皆陳跡  
大半交遊已故墟  
愁絕不知尊酒盡  
醉歸兒女笑牽裾

言懷用子蒼韻

早從微宦去田廬  
慚愧英游許並居  
拙計自憐嵇叔懶  
暮年空悔子公書  
歸尋松竹開幽徑  
坐看牛羊下夕墟  
已把經綸付王導  
不妨練布製襟裾

謝錢巽叔用子蒼韻

底事承明厭直廬孤城天遠寄幽居根塵已誤三乘祖  
香火聊看八會書是處風烟供翰墨何妨杖履入村墟  
皇文近日收遺老妙手終煩補帝裾

寄曾公袞用子蒼韻

五馬歸來識舊廬相門曾對水雲居家聲自可威戎虜  
吏最何勞課簿書好扈六飛還魏闕卻麾單騎復姚墟  
莫欺霜鬢將軍老矍鑠猶能一攬裾

晚興二首次人韻

病骨支離怯晚風，  
不堪遊目送飛鴻。  
書淫老去還知倦，  
酒聖秋來却喜中。  
北伐會須空虎落，  
西邊先欲靖蠻叢。  
卑飛莫起扶搖念，  
徒使莊生笑二蟲。

衰草連雲萬木風，  
天高滅沒見孤鴻。  
夕陽人散酒旗下，  
遠浦船歸漁笛中。  
兀兀松牕翻蠹簡，  
垂垂蓬鬢颯霜叢。  
自憐世味諳來慣，  
已覺忘辛似蓼蟲。

次韻謝人惠詩

翩翩才氣逸輕翰，  
倒寫波瀾筆力寬。  
沈醉不辭金盞側，

清吟長占竹窻寒，捧心欲效羞顰媚。  
斷鼻須煩盡聖漫，辱贈驪珠念無報。  
但驚懷袖有奇觀。

夜雨

夜雨妨清夢，疎簷落細聲。  
幽懷無客語，偶坐有琴橫。  
水澗柴荆迥，風高鴈鷺驚。  
感時思報主，材薄愧平生。

閑閣

閑閣靜無寐，觀書空復愁。  
虞卿雙白壁，晏子一狐裘。  
萬事等歸盡，百年誰得留。  
還將句中眼，為問賈長頭。

行部至南陵題隱靜寺

籃輿行盡萬松岡，得得來看古道場。  
飛錫落花成佛去，後人誰見紫金光。

寄宿隱靜東軒軒外行，引飛泉落地中。  
隔牕聞之如秋雨，瀉簷聲。

踏殘西日寄僧房，一炷爐熏秋夜長。  
誰作響泉喧客枕，夢回歌聽雨淋浪。

次韻李彥達客舍秋懷



落日孤村靜淒風一笛秋寸心灰欲死雙鬢雪添愁未  
報中原復應煩肉食謀獨慚蘇季子計拙做貂裘

次韻彥達

之子初傾蓋論詩即定交心清懸水鑑才逸奮蒲梢貫  
酒移賓榻攜盤雜野肴半醒還半醉相對老蘆茅

木落

木落秋聲迥山寒暮色連時危羞冕絀身老寄林泉濁  
酒平孤憤清吟續短篇一枝吾已足鴻鵠謝哀憐

思歸

梧陰低落月蛩響怨淒風舊隱江烟裏歸期客夢中攬  
夜驚帶緩看燭待花紅莫謾呼歡伯驅愁正罔功

次韻酬彥達

浮榮過眼風脫葉鴛行無復清夢接柴門晝閉雀可羅  
寒日暉暉弄疎樾已種芳蘭滋九畹更遣胎僊舞三疊  
李侯壯志亦可人舉目萬里欲橫絕醉眼時看石稜紫  
吟鬢半作霜棘折方今聖主躬儉勤奏賦不須誇羽獵

中興盛事要磨崖老於文字誰踰結願君勉力上扶搖  
渺渺雲海出飛楫莫隨鍛翻卧窮巷漫學啼螿弔寒月

燒香三絕句

卷去竹書閑棊几卧看桐影轉簷牙試憑波律送清夢  
未信華胥天一涯

霏霏沈水屑玄玉靄靄博山生翠雲羅篋城旁知幾里  
坐令香界徹微熏

閉眼無勞身外思安心有法靜中知香添細炷焚千和

茶碾新芽試一旗

三洞

和香出  
珠囊

華陽集卷三十五

欽定四庫全書

華陽集卷三十六

宋 張綱 撰

詩

次韻錢巽叔見贈

阻澗書郵頓兩忘  
三年清夢獨徜徉  
風旌引興與天遠  
蠶緒牽愁知日長  
逸翮佇歸鴛鴦列  
鳴騶忽下水雲鄉  
秋霖窮巷無人到  
裹飯應煩問子桑

感恩

伊昔趨青鎖嘗叨奉紫宸  
燕間承仄席清問及垂綸  
寵荷皇恩重歸慚白髮新  
粉身那足報結草是吾鄰

幽情

褊性多違俗忘年只舊山  
心隨黃葉謝身與白雲閑  
杜酒頻應酌菜衣賸喜班  
幽情在叢桂為著槿籬環

彥達作詩自歎次韻勉之

未試屠龍學頻應引劍看  
夢驚秋枕雨愁入曙窓寒  
戰伐今年定乾坤萬里寬  
扶搖終一舉回首謝悲酸

日暮

地偏車馬靜門閉水雲深野艇收晴網村春續暮砧危  
腸逢酒怯病骨畏寒侵又見鴉歸盡誰賡梁甫吟

次韻彥達雨霽

坐看飛雨激風雷忽變晴空萬里開殘暑暗隨簷溜去  
新涼頻逐樹聲來朱絃奏罷空三歎白酒寫殘尚一杯  
病懶怕催詩債急強吟垂老不知裁

晚雨

急雨鳴初歇，崇雲凝不流。  
客帆迷息浦，漁火聚烟洲。  
委巷藏身拙，殘編亂眼愁。  
功名心已謝，肯負故山幽。

彥達借研意在白取次韻戲答

斲石染輕翰，對面可十手。  
價重千黃金，欲見那得苟。  
難欺相如壁，寧碎范增斗。  
作詩代君謀，聊以當墨守。

家叔示秋夜詩次韻

秋來天色半晴陰，衰鬢難禁節物侵。  
蘭葉向人方泣露，菊花催酒已浮金。  
莫將詩課頻頻聒，不那愁城日日深。



咫尺南山堪寄傲，欲隨鳩杖徧幽尋。

用前韻

蕭然雲屋敞溪陰，荒徑蒿萊故故侵。  
穿竹晚風輕戛玉，入簾涼月碎搖金。  
畏寒皮骨驚秋早，得酒情懷語夜深。  
臨老工夫在禪說，試拈波若為重尋。

次韻戲彥達思歸

月牕明素練，風榻淨飛沙。  
飲極樽無綠，更長燭自花。  
感時憂未散，得句喜能誇。  
莫寄思歸語，粧寒損鬢鴉。

月夜

漁火前村近秋砧靜夜多山烟歸宿鳥水月動明波燭  
短催詩急樽空柰客何抱愁眠不穩林影半床過

秋夜小酌

宇宙秋光老崦嵫夜色連澄波寒浸月低榭遠浮烟巷  
僻喧都騎杯行促廣筵摩尼原自照沈醉不妨禪

探梅

俗態多違性憂梅不近城詩書看長物林壑寄餘情傍

驛尋梅使衝寒過麴生一枝供細酌歸路見參橫

山中即事

地僻官仍冷心閑日自長  
松篁供遠吹芝朮度幽香  
直木應先伐驚禽忍再傷  
家山吾所愛投老慰相望

次韻彥達折梅

信步尋梅約欣逢亞雪枝  
春藏紅萼小寒嗇暗香遲  
畫角傳新曲粧臺斂翠眉  
廣平心不動唯許筆端知

僻居

陋巷人誰樂窮居意自安擁門雲樹暗繚徑土花乾白  
髮驚時速青燈耿夜寒中原滿胡騎一念一悲酸

次韻彥達對雪有感

朔風卷地寒雲繁忽驚空花墮簷間遠山歷亂眼中失  
飛鳥滅沒天際還緬想端門萬官賀雲陛儼列鳴珮環  
豐年獻瑞天一笑聲動四海具歡顏李侯人物妙天下  
何獨卧窮看屋山曾次冰壺自深瑩管中霧豹難窺斑  
異時富貴恐不免詎忍空歌梁甫艱君看鴻鵠有高志

一舉九萬誰能攀

雪晴

雪晴日脚下茅屋深巷泥融頻  
屐聲幽鳥喚春啼不那  
野梅迎客意先傾愁腸斷送酒邊散  
詩眼安排烟際橫  
晚歲浮榮安用許祇因丘壑未忘情

次韻彥達催詩

老去交親渾謾與興來終日飲  
亡何扣門頗厭催書債  
隱几憑誰遣睡魔肯怪物情相  
楚越端由吾道自立軻

衰慵更著詩煩惱筆陣方開已倒戈

歲暮二首

忽忽歲云暮霏霏山雨頻鳥啼茅舍靜梅映竹籬新  
陋巷無深轍清醕有善隣中原消息斷聊與醉鄉親

寒逐雲陰散年催節物新桃符趨臘市社鼓賽田神  
任性琴書懶呼兒杖履頻君恩難報處家食奉雙親

用前韻

雪殘春信近山迥客愁新興極樽無酒詩成筆有神  
玩

心雲物變驚夢雨聲頻坐對華嚴海忘言意自親

野望

日落寒雲薄樓高望眼迷興亡千古恨衰病萬行啼  
拔士空巖穴防秋尚鼓鼙建章何處是坐待玉繩低

探梅

倚空山翠羅曲屏入山曉日寒淒清蒼龍道前散疎影  
幽鳴勸坐回新聲探梅忽見數枝發曳杖折來雙眼明  
綽約東臆可無伴煩君火急呼麴生

彥達乘小舟醉歸墮水作此戲之

舍爵頽然飲中僊夜歸一葦航深淵長歌扣舷天上坐  
起舞失脚水底眠未省渴羌笑肉動會令鼯鼠驚腹便  
布帆無恙急藏去明年更試春江船

次韻李公顯

士有鴻鵠志萬里一舉翮胸中自廊廟肯顧三畝宅李  
侯氣邁燕詞鋒凜霜戟老夫晚結交文會欣有繹劇談  
到時事唾手欲任責短褐天路高畝畝抱忠赤風雷惜



變化泥蟠等蜥蜴結茅山下樵爨走僮獲富貴會有  
期簞飄豈不適世態翻覆手寧較黑與白興來時一杯  
南牕俯君碧

歸自金壇值雨宿顧龍山翌日施米作供

蒲牢不擊火晨炊風伯如何聖得知留我艤舟明日去  
滿堂香飯雪翻匙

次韻公顯見贈

李侯詞氣吐朝陽光焰直成萬丈長綠髮莫將塵土暗

會看它日照金章

年齊耆舊愧衰陽  
懶性唯耽野趣長  
了卻官租更何事  
君王約法已三章

用前韻戲公顯

初試梅粧愜壽陽  
葉砧山上夜何長  
式微未盡閨中怨  
東哲那辭補一章

送公顯應舉

堂堂筆陣一當千  
得意秋風急著鞭  
百萬破荒明日事

未應長欠畝頭錢

次韻公顯木樨

鋪茸紫葵亂晴颺點金寒菊棲短籬木樨韻高陋凡枝  
顧與葵菊同堦墀香聞十里自絕奇造物豈偏雨露滋  
閒見層出珠琲垂鵝黃靛粧宮樣宜烟銷紅日下薄帷  
宴坐幽牕風度時頗覺飄飄蘭蕙姿著人不去催作詩  
李侯為續離騷辭香花端從筆下移花前把卷不停披  
何以酬君金屈卮

次韻公顯賦蠟梅詩二首

壽陽催粧花睡起半額殘黃嬌欲語香魂浮動滿幽思  
著莫春風暗相與李侯鐵心似廣平筆力萬鈞談笑舉  
詩成夜誦更清絕向來誰識袁臨汝句中有味應獨知  
吟罷餘甘發微咀

愁裏危腸日九迴今朝愁眼為花開一枝斜倚向人笑  
應報上林春信來

從丁世叔覓花栽

老去看花能幾回  
旋移花榭著行栽  
君家封植滿烟露  
分我一枝春色來

庚午三月十日遊茅山

雨餘沙徑淨無泥  
策杖何妨過竹谿  
迎客野花隨處發  
勸沽幽鳥向人啼  
峯巒路轉攀蘿倦  
樓觀烟深望眼迷  
疑是武陵僂地隔  
坐來遐想舊桃蹊

王伯壽見復用前韻奉答

瓶空何必醉如泥  
送客誰能過虎谿  
一枕閉門追蝶夢

兩行森木聽鶯啼  
新詩未讀心先伏  
細字徐看眼欲迷  
筆底春風有生意  
他年桃李會成蹊

次韻伯壽述懷

仲蔚蓬蒿滿徑荒  
主人曾是漢中郎  
干時不利初無術  
醫國那知別有方  
老去與誰同臭味  
秋來多病獨悲涼  
倚天長劍君休問  
腐肉當前亦斂銳

邀韋汝昭同宿上館

打牕風雨夜蕭蕭  
客裏誰堪伴寂寥  
五字蘇州有苗裔

高吟何必更聞韶

題華陽南牕

擾擾何年斷俗緣  
從今便合老山間  
會將碧澗洗心淨  
坐看白雲終日閒

衰病辭榮蒙恩賜  
可時小子堅方塵  
末第陳德  
昭袁仲誠惠詩褒借甚寵次韻奉答二首

蕭蕭兩鬢雪毛新  
忝竊清朝舊薦紳  
陳力心知難就列  
引年恩許致為臣  
臥家正恐貽官謗  
增秩俄驚捧帝綸

溫飽一門生意足捐軀無路報涓塵

月窟當年衰桂香衰蘭那敢望重芳姓名忽見偕千佛  
骨相端知誤九方老樹逢春欣有藥新離出谷敢爭翔  
琢磨賴有交朋在高義無專數范張

用前韻再簡二首

三復長篇句法新蘭言紉佩更書紳才高奚啻千人敵  
譽過空慚一介臣莫訝筆端能品漆定由胸次有經綸  
波瀾萬頃分餘滴洗盡昏花滿眼塵



二妙爭開古錦囊爛然佳句壓羣芳奉高遺德歸臨汝  
文範流風在李方顧我挂冠寧復振生兒附翼豈能翔  
願公勉力躋雲路視草斯文要主張

赴喜雪御筵歸作

喜雪排筵曉漏催玉人傳詔下天來香隨日轉蓬萊近  
花帶春回錦繡開一線新陰留鼓吹三登和氣入樽罍  
叨霑惠渥思歸美授簡梁園愧乏才

進呈皇太后回鑾事實

奕世占來寶運昌  
母儀垂慶肇生商  
鑿回長樂神人喜  
書就蓬山日月光  
北闕導迎三衛仗  
東朝歡奉萬年觴  
太平盛事人相語  
孝德回天賴我皇

太廟靈芝產于仁宗皇帝英宗皇帝兩室前楹  
芝上有文成王字臣叨陪政府得預榮觀謹課

成律詩二首

吾皇聖德紹先猷  
清廟華芝屢降休  
道盛百王神畫驗  
祥開兩室化功侔  
犧樽影照彤雲聚  
藻梲光連瑞氣浮

願詔樂章歌偉蹟更從來歲薦郊丘


升平和氣格天淵瑞物嘉生太室前根托丹楹朝麗日

葉敷華蓋護非烟燕胎為祝多男慶天母人符萬歲篇

聖意每勤宗廟事屢蒙休應答精虔

神芝名燕胎燕玄鳥也有天命生商

之兆古辭靈芝篇云陛下三萬歲慈母亦復然



華陽集卷三十六

欽定四庫全書

集部

華陽集卷

三十七至  
四十

詳校官庶吉士臣瑚圖禮

主事臣呂雲棟覆勘

總校官編修臣王燕緒

校對官主事臣陳文樞

謄錄監生臣宋學濂

欽定四庫全書

華陽集卷三十七

宋 張綱 撰

詩

歲前三日立春值雪會同僚飲

三日殘冬起臘回飛雲滿眼送春來香浮綠勝隨宜帶  
花著瑤林是處開已卜屢豐歌井邑何妨乘興倒樽罍  
東陽莫訝休文瘦老病仍添一歲催

上元

上元春色壓輕寒故事賓僚集晚筵合坐香浮花裊娜  
捲簾風定月嬋娟閭閻盡道宜新歲燈火何妨減去年  
堪笑樽前窮太守只愁老病欲歸田

休官

乞得清朝一病身杖藜歸去老山村室廬旋築新椽就  
松菊猶尋舊徑存漸喜有緣窮野興只慚無路報君恩  
百年來日知餘幾且把生涯付一樽

弟姪三人同日受官實為吾家盛事老懷不勝

忭喜作四小詩見區區之意

恩光初自九天來  
玉樹三枝一日開  
造物無私人共慶  
那知陰德舊栽培

三世追榮荷聖恩  
諸孫仍見捧絲綸  
當年孝友家聲在  
流慶增光屬後人

恩袍新綠照新秋  
文雅鄉評早見收  
王謝故應人物勝  
芝蘭生處自風流

清時得謝老山村  
弟姪相過慶一門  
結綬滿庭青若若



莫辭勤苦報君恩

郊祀慶成用臨韻

圓丘迎日至大駕肅天臨  
樂奏來靈享嵩呼動德音  
均恩寰宇慶望闕老臣心  
基命歌周雅何勞五字吟

作亭池上日游其間頗覺自適

歲晚穿池結小亭地偏聊欲寄幽情  
虛簷風度披襟爽曲岼波平照眼明  
過我賓朋無厭數傍人鷗鷺不須驚  
聖朝乞得身閑散便覺淵明是隔生

題喜歸亭

君恩賜我老菟裘，旋築池亭野趣幽。  
地勢曲連青嶂遠，波光環匝翠烟浮。  
興來樽酒隨時辦，客散琴書盡日留。  
為問標題意何在，一生心足是歸休。

次韻袁仲誠見贈

解組清朝返舊鄉，依然門巷接回塘。  
閒身乍覺鳥聲樂，緩步重尋花徑香。  
多謝故人停桂棹，何妨清夜醉霞觴。  
新詩贈我光蓬屋，什襲應同夏后璜。

再用喜歸亭韻

晏子區區惜敝裘，吾衰亦戀故山幽。  
得歸更喜詩盈袖，任達寧須酒拍浮。  
已縱虛名身外去，肯將俗物眼邊留。  
只慙老負君恩重，結艸他年報未休。

送張輔卿省試

明詔搜賢動四陲，西來一鶚冠羣飛。  
擅場筆勢驚華省，發策才名上紫微。  
無負題橋平日志，要看懷綬故鄉歸。  
相逢肯惜傾家釀，已約鶯花慎勿違。

簡表仲誠覓芍藥花

老來百計不相關  
詩句雕鐫興亦闌  
祇有好花堪照眼  
從君聊借一枝看

仲誠和詩四首又疊送花再用韻答

筆陣橫飛屢叩關  
嚴兵夜戰迫更闌  
好花多謝頻分我  
怯敵魂驚未暇看

避寇舟中風雪大作

扁舟避寇艤山隈  
問捷江城信未迴  
犯夜號風驚夢破

催寒飛雪送愁來  
三軍挾纊煩溫詔  
百戰塞旗賴雋材  
已辦磨崖頌功烈  
竚還生意發春雷

王伯壽示佳作備述窮苦次韻奉呈

吟殘翻水筆生春  
秀句驚人字字新  
賦料揚雄誰可敵  
才高太白善無鄰  
清心鳴鏑增豪氣  
刮膜神篋淨俗塵  
唯有許窮疑太過  
文章從古忌悲辛

雪作

朔風吹雪應嘉時  
荻荻空庭靜夜知  
歲稔不須占瑞諫

家貧尤喜映書帷  
花雖無艷難爭巧  
舞不成行也自奇  
病起老翁迷眼界  
寒牕呵筆強裁詩

招親舊賞花

名花朵朵向人開  
家釀沈沈旋撥醅  
咫尺晴川風更便  
追歡何惜片帆來

安人生日

聞道防秋吉語來  
生朝宴席為君開  
黃花也似知人意  
爭挽歡聲入壽杯

聞大帥勇決直趨北界喜而作此

牙旗動處擁貔貅直渡黃河塞草秋百萬強兵陣前死  
肯教衛霍獨封侯

次韻王周伯和應文詩

先生詩興浩難收苦思俄驚兩鬢秋變格競傳吳富體  
懷沙擬續畔牢愁會令後學輕焚藁消得詩名號倚樓  
我老恨無青玉案錦囊分示若為酬

應文監視刈穫有詩輒和一篇恐以一飽廢學

因而勉之

杖藜何日下西疇想見欣逢歲有秋可但聚糧供腹飽  
還應釀秫散眉愁決科佇看標金榜得路終期侍玉樓  
莫把光陰等閑棄一朝清問要人酬

九日用前韻

閑裏光陰逐水流重陽忽復故園秋休言白髮從教老  
試插黃花也解愁感舊有時曾落帽憑高無力更登樓  
昏昏病懶惟堪睡詩債休催未暇酬



走筆戲呈世叔伯達二親友

老來無計了殘年，祇有歡情寄酒邊。  
歌舞借看真達士，忍將朱戶鎖嬋娟。

次韻周伯見贈

幼子童孫乏寸長，遷官同日被榮光。  
芝蘭瑞色來空翠，雨露恩言滿詔黃。  
莫訝飛騰循九品，會看毫末聳千章。  
即今天子收羣策，廊廟許謨要玉張。

用前韻

百歲休誇日月長十分逾八歎流光精忠許國心猶赤  
老病催人髮已黃扶杖每聞宣鳳詔望雲無路仰龍章  
恢圖幸有臯夔在坐看朝綱萬目張

次韻方守送進士

下詔徵多士彈冠動四溟三場遵舊典八韻見明經  
勸駕勤州牧吟牋詫地靈春風歸路近衫色照山青

次韻周伯謝綿襖長篇

最宜為誥唐仲舒上林子虛漢相如喜君萬事懶著眼

獨尚文章情未疎家貧肯戀儋石儲船漏則已那復祓  
素志蹉跎雪侵鬢青衫匍匐塵滿裾可憐虞翻屯骨相  
相逢呼我丈人行夜聞抵掌論開邊怒髮衝冠亦何壯  
鸚裘典盡終諱寒忍寒悲歌行路難綈袍恐貽范叔怒  
長篇忽掃烏絲闌辭章典要古所尚餘子碌碌何足仰  
願君回筆頌皇猷偃武修文答靈眈天子亟欲聞盡言  
前席還應虛齟纒

老夫辭榮里居行年八十酒間漫成拙句二首

述意而已不以示外也

莫笑樽前白髮翁曾騎竹馬戲元豐年彌八袞癡頑在  
身荷三朝寵眷隆綠野敢將前哲比香山幸有老人同  
興來尚欲尋幽去收拾殘春杖屨中

老病辭榮日月邊歸來擬作地行僊飛霜滿鬢三千丈  
止水觀心八十年松菊尚存堪寄傲干戈未定敢安眠  
君王宵旰圖恢復洗眼神兵策萬全

親舊以老夫年及中壽既辱臨况又多以詩詞

相慶祝頹衰謝何以得之輒成鄙句叙述感悰  
老來光景去駸駸親舊應多惜老心傾蓋義高雙白壁  
開函詩敵萬黃金催年生怕玲瓏唱醉夜寧辭鑿落溪  
多謝慇懃祝強健寄言衰病莫相侵

老病

蕭然華髮映蒼顏九袞開來第一年鍊盡交游難諱老  
養成衰病却安禪新春已負登山屐舊賞空慚載酒船  
張緒風流那復少坐看飛雪弄晴烟

送蒼孫省試

英髦雲集幾千人，羣試爭看藝絕倫。  
一鼓擐旗先作氣，三場下筆要如神。  
決科無失青氈舊，拜賜重添綠綬新。  
秀發孫枝吾欲見，夢魂已到上林春。

次韻洪總領題花信亭得江樓二首

誰為傳花信，新亭破睡風。  
春回芳意早，客到賞心同。  
酒盞搖江綠，詩牋照坐紅。  
無由接歡宴，危坐正書空。

地勝宜樓觀臨江勢屹然橫波吞翠壁倒影插雕椽老  
子難收興雲安未足憐由來詞翰手五鳳獨居前

見華陽舊題刻石有感

舊句入貞珉新題亦已陳光陰如許速誰是百年人

某上章辭免召命蒙恩矜許仍賜羊酒存問自  
念衰殘辱此異數不勝感天荷聖之情謹課成  
拙詩一首

昧死飛章上九天懇辭嚴召卒餘年綸言寵念桑榆迫

臺醜恩垂雨露偏異數一時真創見窮鄉萬口徧誇傳  
吾衰忝冒知難報結草他年敢避先

用前韻

召節煌煌下帝闕君王圖舊起高年露章懇避回天速  
拜命歡呼壓地偏錫饌宰官侵夜到問安州牧置郵傳  
辭榮有耀人皆說誰解清時獨占先

考妣贈官一時榮耀老懷易感輒敬書長句

絲綸五色錦為囊寵贈雙親廟室光位列三孤升極品



名加大國啟新疆劬勞仰荷湛恩報精爽應知積慶長  
燕及子孫宜勉力忠勤他日繼遺芳

送彥禮弟赴歙尉四首

莫辭官小路間闕趣取春風穩著鞭無限清時推轂手  
冲天何必待三年

池塘春艸促君詩阿緒風流絮欲飛滿眼吾家好風景  
正須相賞忽相違

高才自是古梅僊綵棒何須向壁懸晉盜奔秦無一事

爐薰深炷好安禪

空詩羞澁送君行老病難堪叙別情  
天假吾年未填壑  
它時猶及問歸程

舊所乘馬老且瘠見之感懷

人衰馬亦老不踏長安道筋力漸疲羸  
鞍韉謾華好見  
我勿嘶鳴為爾動懷抱無復矍鑠時  
去去飽豐草

夜思出處因作戲言

仕路定風波人生能幾何時來聊試手  
為瑞不宜多

老來交朋淪謝雖婢僕亦無在者感舊忽覺淒  
然

故交淪沒水東流歲晚無人話昔遊飛絮落花何足道  
忽經風雨亦添愁

華陽集卷三十七

欽定四庫全書

華陽集卷三十八

宋 張綱 撰

輓詞

顯仁皇后輓詞二首

輔漢陰功大生商寶運開俸從湯邑省恩向外家栽奄  
忽乘僊馭劬勞動聖哀園陵奉遺詔終不費邦財

二

長樂坤儀肅思齊母道全九州供大養八帙茂遐年仗

簇江山外哀纏日月邊遺芳歸史筆萬古照青編

三

仗去慈寧殿神歸永祐宮問安迷輦道洒淚慟宸衷水  
逝長江月天號宰木風平生尚慈儉流澤到無窮

鄭國太輓詞四首

五福兼全舉世稀庭闈早日見清規應期千載生公輔  
掩迹三遷號母師漢魏疏封華國史蘋蘩遺德繼周詩  
年年祇說重陽近無復黃花酒一卮

一夕萱堂事已非百年遺範在豐碑  
頌花玉殿春風暖奉詔登樓夜漏移  
罷宴已聞修故事回班那復見新儀  
音容寂寞應先去香火因緣祇自知

蘭桂秋風一夜催  
衮衣何處望南陔  
堂垂斗帳銷香篆  
鑑掩飛鸞下玉臺  
漢使從天虛函簿  
胡笳和月助悲哀  
東門咫尺佳城在  
雙鶴飛空日幾回

銘旌冉冉去飛揚  
蕭瑟西風泣畫堂  
不見魚軒辭繡轂  
空餘鷲誥冷綃囊  
姓名自是標僊籍  
環珮應知返帝鄉

盡把遺芳歸史筆會令千古獨輝煌

何丞相輓詞三首

一德乘亨運三公冠宰司秉鈞回直道解組向明時人  
去空圖畫名存祭鼎彛懸知千古後貧懦激清規

二

帝念虧三鑑天臨動八鑿飛星瞻傳說舊學記甘盤治  
定身先退名全德不列于何驗符策有子嗣鴛鴦

三

不愁遺元老巖巖失具瞻  
勳庸扶廟社名字到閭閻  
王國開封大師垣寵數兼  
夢鷄初莫省今日竟成占

譚勝仲輓詞二首

詞伯風騷舊公朝宿望存  
郎官寧出宰廷尉極平反  
夢斷天衢遠愁連野樹昏  
祇應陰德茂蘭玉照千門

二

時論歸清德耽書到白頭  
士應知己用人豈法家流  
骨瘦凌孤鶴詩豪壓萬牛  
悲看耆舊傳誰復繼前修



湯德廣輓詞三首

四海知名士三朝老從臣勤王安反側分閫試經綸天  
闕鴛鴦行斷山空馬鬣新豐碑滿忠義千古詔簪紳

二

忠憤憂時切風雲得路先官箴循吏傳家法棣華篇滅  
虜兵方急優賢席屢前如何天不憇高冢卧蒼烟

三

束髮師前輩忘年得此翁鷄豚同里社詩禮共家風別

去十年久書無三月空歸來人不見銘旒舞斜紅

張彥度輓詩二首

京兆吾宗不乏人煌煌朱紱照簪紳棠陰訟簡絃歌樂  
蓮幕才高書諾新北海但知樽有酒萊蕪誰念甌生塵  
哀笳忽送秋風急忍看遺踪萬古陳

滿目溪山舊賞心杖藜那復共登臨平生友誼情無間  
累世宗盟分更深願我老懷誰告語思君遙夜獨悲吟  
流風賴有諸郎在他日相親倘嗣音

莊弱翁輓詩二首

厚德鄉評最知名國士同郎曹參列宿宰屬輔宗工紫  
詔恩垂下黃梁夢已空九原那可作流涕濕西風

二

仕路青霄逼還家白髮生一麾驚作夢三徑適幽情孰  
謂如蘭契先隨逝水傾送君悽斷處烟雨暗銘旌

胡氏碩人輓詞二首

吾舅當朝傑幽芳配德同典刑家法整湯沐上恩隆鸞

影悲塵鑑蘭芬泣露叢音容不知處宰木夜號風

二

我有劬勞念多從外氏遊母儀頻接待賓饋每淹留應  
惜年垂老相親禮特優一朝千古別衰淚不能收

舅李侍郎輓詞三首

射策飛騰早推賢望實兼直心常自負大器果難淹持  
橐丹墀穩分符畫戟嚴平生莫追憶淚盡轉愁添

二

諸舅唯公在承顏念母存笑看身已老情話意彌溫不  
作求田計方期報主恩高堂忽蕭瑟誰為賦招魂

三

強健公先去零丁我曷從同盟空白水哭似有衰容休  
說鶴行夢看成馬鬣封淚流南望眼愁絕暮雲重

洪慶善輓詞二首

畫省真郎選朱幡老郡侯名歸時論重行向古人求嗜  
學千雞跖修文五鳳樓秋風忽心驚夢懷舊涕交流

二

忝戚鄉閭舊論交道義深窮搜千古意樂易一生心遭  
謗身雖貶全名死不沈君恩為昭雪歸定得家林

吳氏太淑人輓詞

生兒要路早飛騰玉瑱金花寵屢膺天壽康寧逾九帙  
佛心明了契三乘葭莩永歎音容阻閭里空存孝義稱  
追想潘輿從游處青青烟草正愁凝

陳叔美挽詞

坦腹東牀衆莫竒  
堂堂吾弟獨君知  
交親未及親三歲  
淪喪俄驚共一時  
琴在我方悲子敬  
禮存誰為哭言思  
山阿幽室十年閔  
輓語空吟靖節詩

外祖李承事輓詞二首

總角承顏賴擊蒙  
後生因識古人風  
忘情自到羲皇上  
盛事多談慶曆中  
雙壽兒孫青若若  
一門慈孝鬱葱葱  
吁嗟耆舊今何在  
古木斜陽瀨水空

西山忽與老人期  
未報深恩忍復思  
燕及祖風從少小

與聞家訓識操持  
耶從諸舅紀遺行  
深愧外孫無好辭  
懸想追封在他日  
附書名傳有佳兒

舅李義卿輓詞

由來甥舅兩相依  
存沒誰知半路虧  
在側每蒙誇叔寶  
不才那得似牢之  
臨風酌酒酬春處  
對月憑軒語夜時  
回首淒涼已陳迹  
壯心無哭柰愁思

沈洞元輓詞

天闕辭嚴召雲棲得坐  
忘尊生三洞錄起死  
上池方神



託飛魚化丹餘舊竈香從今紀甲子華表佇還鄉

徐獻仲輓詞

一尊相別未經時情話如今忍復思老去交親能有幾  
年來懷抱更誰知谿橋路斷秋風急香火庭空曉日遲  
三尺孤墳閉千古傷心東望涕交頤

丁宣仲輓詞

回首三年別追懷一笑歡坐移香砌暖飲散燭花殘蒿  
里歸何速桃蹊忍復看秋原愁絕處為想鶴鴿寒

李居正輓詞

白首論交舊黃冠獨此人誠全知俗薄語直見情親上  
館鍾魚在空壇月露新如今入山去行處是悲辛

丁明仲輓詞二首

世德知名早鄉評第一流折腰官易厭拄頰興難收博  
物千尋海高情百尺樓平生松菊徑蕭瑟晚雲秋

二

里社欣相接葭莩晚益親過從忘忘客禮簡易見天真把

酒微風夜歸舟細雨春如今每追憶悽慟欲傷神

陳美成輓詞二首

望族推平輿清芬嗣太邱鄉評嚴禮法家學遠源流幸  
託葭莩契方期仗履遊西風忽悲慘忍復看眠牛

二

德潤洮湖濶心平福地安流風前輩似雅量鄙夫寬松  
菊開三徑芝蘭秀二難百年如轉燭蕭瑟夜堂寒

丁宋卿輓詞

舊約頻相過，交情忍獨違。  
四時閑仗履，一榻冷烟霏。  
易感龍祠別，難期鶴馭歸。  
老懷誰共語，東望益霑衣。

彥節弟輓詞二首

吾家奕奕茂芝蘭，士論尤推季孟間。  
挾策可憐場屋老，杜門空對水雲間。  
嗟余屏跡常多病，幸爾論心數解顏。  
乘興過從無復日，忍將愁眼望西山。

解組歸來會面初，杖藜朝暮過吾廬。  
相親樽酒情無間，共話田園樂有餘。  
樗散年顏方倚託，隸華風急頓蕭疎。

堂堂人物無高壽不那傷哀淚滿裾

彥深弟輓詞

憶弟懸弧日當余弱冠年艱勤同素志衰病各華顛辭  
祿歸相倚驚魂去忽先一樽風雨夜那復共蟬聯

陳子張輓詞二首

地發湖光秀神鍾鶴骨清高談排俗子執友遍時英枳  
棘鸞棲在松楸馬鬣成欲收東望眼流涕若為情

二

交契先朝露淒涼對夕暉箕裘三世遠簿領一官微翠  
柏開新隧青編冷舊幃元方未慚長萬里看橫飛

堅所生母李氏安人輓詞四首

僂李移根遠天桃表慶長九重頒象服三世奉萱堂尚  
想慈祥性難追淡靚粧眼酸生怕哭雙淚忽淋浪

天桃  
事見

後

二

四德騰芳早三乘悟性空清修忘俗累勤儉肅家風舞

鏡鸞悲影飛花雨泣叢愁情無處著半入夢魂中

三

舊約余偕老分違汝忽先有懷中饋闕無憾母儀全望  
斷送歸路衷纏垂盡年何當卜同穴相與伴愁烟

四

七帙開逾半孤芳散若飄可憐頻舉案那復記吹簫翠  
幌浮埃積熏爐舊炷消如何寄懷抱細雨夜蕭蕭

華陽集卷三十八

欽定四庫全書

華陽集卷三十九

宋 張綱 撰

長短句

念奴嬌

次韻蔣仲遠是日醉甚逃席

論思厭久動尊鱸清興輕辭丹極佩玉腰金歸故里光  
照湖山秋色八坐儀刑九重尊寵才大今詞伯漢庭豪  
俊一時誰是勍敵 三徑舊日家聲華堂深穩處頻開  
瑤席春在壺中真自有一境珠宮僊掖譚塵揮風罰籌



如蝟數困樽前客故應元放舉杯狂醉輕擲

二

次韻李公  
顯木樨

多情宋玉值西風搖落悲秋時節賴有幽芳深解意的  
樂枝頭爭發欲語含羞斂容微笑心事如何說暗香時  
度捲簾留伴霜月 誰為賦寫儂姿揮毫落紙有樽前  
詞客獨倚闌干須信道消得孤吟愁絕補闕騷經拾遺  
香傳頓許居前列品題多謝一枝當為君折

青門飲

京師送王  
敏求歸鄉

疎柳飄零暮鴉寒集都門送客斜陽影裏野色沈沈翠  
微隱隱送指故鄉雲外聚久交情厚對西風爭忍分袂  
飲散賓朋畫船去也平蕪千里因記小軒無寐觀夜  
月凭闌共論深契絳帳清閑杏壇優暇當念宴遊同醉  
南北烟波遠願無忘音書頻寄未知名宦拘人異日相  
逢何地

驀山溪

甲辰  
生日

小牕開宴草草杯盤具歡喜走兒童慶生朝一年一度

風光好處恰是小春時香泛泛酒醺醺一曲歌金縷  
吾今已醉解作醒時語千里念重親望家山雲天盡處  
深深發願只願早休官居顏巷戲萊衣歲歲長歡聚

臨江山

次韻陳少  
陽重九

綠蟻浮觴香泛泛黃花共薦芳辰清霜天宇淨無塵登  
高宜有賦拈筆戲成文可柰園林搖落盡悲秋意與  
誰論眼中相識幾番新龍山高會處落帽定何人

二  
日堅生

追想京都全盛日，蓬弧初記生時朝。來朱紱照庭闈，誰  
知衰謝老還。有寧馨兒，休說藍田生。美玉舉杯聽取  
歌詞年方強，仕未應遲。高風輕借便，一鷲看橫飛。

滿庭芳

生日

十月風光小春時候，燕堂初啓。朱筵博山雲潤，風細裊  
晴烟，坐有文章公子。爭吟唱詩滿花牋，簾帷裏時聞笑  
語。今日間生賢。郎潛雖未貴，虛名自有清議，推先更  
那堪。高堂重慶福，魚全占。取人間樂事，何必羨玉帶貂

蟬飛觴處深深更祝龜鶴永長年

二

榮國  
生日

風軋雲低寒催臘近畫堂和氣先春玳筵初啟佳會慶  
生辰漏轉高張寶炬重簾邃深炷爐薰歡聲裏清歌聞  
登一曲繞梁塵慈闈春不老山河象報恩被絲綸占人  
間榮貴蘭玉洗洗便好金尊盡醉殷勤勸須滿十分深  
深願斑衣拜舞千歲奉靈椿

萬年歡

榮國  
生日

歲晚寒凝正賞舒四葉梅吐孤芳慶誕佳辰開筵盛集  
萱堂合坐春回錦繡捲簾處花簇笙簧除樂禁初許開  
韶應時歡宴何妨 人言富貴最好算有誰能兼福壽  
康強自是僊姿天教占取恩光百和重添寶炷十分勸  
頻舉瑤觴仍教畫嘉慶新圖要看蘭桂成行

浣溪沙

榮國生  
日三首

羅綺爭春擁畫堂翠帷深處按笙簧寶奩頻炷鬱沈香  
海上蟠桃元未老月中僊桂看餘芳何須龜鶴頌年

長

二

臘日銀罌翠筩新潘輿迎臘慶生辰捲簾花簇錦堂春  
百和寶薰籠瑞霧一聲珠唱駐行雲流霞深勸莫辭  
頻

三

象服華竿兩鬢青喜逢生日是嘉平何妨開宴雪初晴  
酒勸十分金盞落舞催三疊玉娉婷滿堂歡笑祝椿

齡

四

安人  
生日

過隙光陰還自催生朝又送一年來宴堂深處強追陪  
眼眩豈堪花裏笑眉攢聊向酒邊開與君同醉莫辭  
杯

點絳脣

榮國生  
日二首

飛雪初晴曉來佳氣生庭戶寶薰籠霧簾幕香風度  
鶴髮龜齡堂上潘輿駐花深處緩歌金縷莫惜杯頻



舉

二

羅幕重重畫堂迎臘和風轉玳筵高展知是羣僂宴

銀鴨香浮紅袖翻歌扇金杯勸深深祝願爭把蟠桃獻

江城子

和呂丞送  
進士赴省

寶津樓下柳陰重畫橋東戲魚龍聞喜當時開宴盛儀  
容遙想新年尋故事扶醉帽夕陽中可憐衰鬢颯霜  
叢借醜紅遣愁濃夢入長安驚起送飛鴻直下青冥休

避路九萬里看搏風

綠頭鴨

次韻王伯壽

歛晴烟桂華如水輕寒宴中秋朋簪來會滿筵綠鬢朱  
顏罄樽壘興吞海量妙歌吹聲徹雲端獨念衰殘強陪  
歡笑恍然感舊覺悲酸功名志黃梁曉夢老去柰何天  
休追悔天應教人贏取身閒想姮娥情都如舊也須  
知我貪歡柰潘鬢霜蓬漸滿况沈腰革帶頻寬月有重  
圓人誰長健一回相見一回難王夫子看君風度何不

早彈冠莫學我年年對月扶病江干

二次韻陳

季明

愛家山坐來心與雲閑念平生功名有志暮年多病知  
難眷簪纓未容引去柰猿鶴久已催還松菊關情尊鱸  
引興昔人高韻照塵寰細追想山林鍾鼎從古罕兼全  
歸來好皇恩賜可拂袖欣然望西清猶叨法從夢魂  
寧隔台躔蒔七松便為小隱開三徑且樂餘年賓友相  
過鷄豚為具從容聊作飲中僊君試聽陽春佳闋今日

恰新傳休辭酒從教醉舞踏碎花氈

感皇恩

休官

解組盛明時角巾東路家在深村更深處掃開三徑坐  
看一川烟雨故山休笑我來何暮 苦貪富貴多憂多  
慮百歲光陰能幾許醉鄉日月莫問人間寒暑興來隨  
短棹過南浦

朝中措

安人生日

年時生日燕高堂歡笑擁爐香今日山前停棹也須隨

分飛觴 東陽太守攜家去遠方  
遡桐江把酒祝君長  
健相隨歸老故鄉

二前年十二月十八日入對遂除  
吏侍今在婺逢臘月十八日也

前年初對大明宮寒律轉春風  
幾度鄉關歸夢催成兩鬢霜蓬  
山州歲晚逢令節空記前蹤  
莫遣酒兵相對愁城生怕頻攻

三臘日

休驚初臘凍全消旬日是春朝  
梅吐芳心半笑柳含青

眼相撩 風光如許那知太守無繆乘興方思把盞歸  
心已逐輕橈

鳳棲梧

安人生日

五日小春休屈指花發西軒早已傳春意應為高堂催  
燕喜一枝得得來呈瑞 綺席初開雲幕遠蘭蕙騰芳  
人在蓬壺裏壽酒滿斟那惜醉錦囊行拜恩封貴

二

雨洗軒庭迎晚照黃菊纔芳未覺秋先老怪底烘堂添

語笑姝娥此夜來蓬島  
獻壽新詞誰解道滿眼兒孫  
著語皆爭巧漱灑金杯休惜酬  
追呼不怕霜天曉

三  
席上

風勒飛雲迎曉霽銀海光浮宴啟羣僂會騎省流芳誰  
可繼樽前看取連枝貴  
華髮衰翁羞晚歲未報皇恩  
尚忝專城寄酒入愁腸應易醉已拚一醉酬君意

四  
生日

老去光陰驚掣電生長元豐試數今誰健多謝天公憐

歲晚清時已得身閑散  
憶昔生朝叨睿眷  
餽頌恩  
內酒當筵勸  
今日衰殘歡意鮮  
舉杯目斷堯天遠

五

丁宅三  
詩兒

緩帶垂紅雙侍女  
綵鳳銜來秀色生  
庭戶轉蕙光風香  
暗度回眸綽約神僊侶  
寡和清歌聲激楚  
夜飲厭厭  
勸我杯頻舉  
祇恐酒闌催暮雨  
憑誰約斷陽臺路

好事近

梅柳

梅柳約東風  
迎臘暗傳消息  
粉面翠眉偷笑似欣逢  
佳



客 晚來歌管破餘寒沈烟裊輕碧老去不禁卮酒柰  
樽前春色

菩薩蠻

上元

重簾捲盡樓頭日華燈萬點歡聲入老病莫憑欄一城  
星斗寒 艷粧翻舞雪目眩紅生纈不是故無情羞君  
雙鬢青

二

南山只與溪橋隔年來厭著尋山屐卧對曲屏風淡烟

疎雨中 功成投老去判作林塘主萬事不關心酒杯  
紅浪深

清平樂 上元

紅蓮照晚花底明人眼無限遊人誰惜倦只有衰翁心  
懶 笙歌緩引更籌更闌客散添愁香霧半牕幽夢烟  
波千里歸舟

人月圓

壬午生日時初遇會  
慶節至翌日小集

封人祝望堯雲了歸路藹歡聲何妨明日開筵笑語聊

慶初生 官間歲晚身猶健  
蘭玉更盈庭 持杯為壽從  
教夜醉誰怕參橫

西江月

壬午  
生日

易老方驚歲晚難禁又報生朝從他華髮轉蕭蕭且共  
樽前一笑 為具隨宜餽飮烘堂不用笙簫祇煩歡伯  
散無慘醉裏追回年少

惜分飛

次韻丁  
希閔

年少春心花裏轉只恐飛花片片沈醉歸深院  
妓衣何

用令高捲 要看梁州初入遍  
放出樓中舞燕有眼何  
曾見看來未足重開宴

減字木蘭花

安人生日

思堂醉酌滿酌金杯爭獻壽  
記取年時頭白成雙唱舊  
詞 莫言秋晚五日小春黃  
菊綻折一枝來綸誥金花  
要並開

華陽集卷三十九

欽定四庫全書

華陽集卷四十

宋 張綱 撰

附錄張公行狀

故資政殿學士左通議大夫丹陽郡開國公食邑二千  
二百戶食實封一百戶致仕贈左光祿大夫張公行狀  
曾祖俊贈太子少保妣朱氏贈普安郡夫人祖祺贈太  
子少傅妣王氏贈齊安郡夫人父翽任右朝議大夫致  
仕贈少保妣李氏贈榮國夫人

公諱綱字彥正姓張氏其源出於姬姓黃帝之後青陽氏第五子揮為弓正始制弓矢子孫因賜姓焉周宣王有卿士張仲其後裔事晉為大夫至唐支派漸廣世居河朔有官于潤者遂家金壇曰銑上柱國曰連王揚州六合簿寶應貞元制書具存南唐李氏考定其書以其家為是邦衣冠之裔公自叙譜牒載本末甚詳由高祖王父而下皆晦迹以德行稱鄉里逮公登二府三代贈官保傅榮及九族矣公幼而穎悟沈厚寡言始入小學

與羣兒伍特不好弄鄉先生授以經史一覽輒不忘由是日記數千百言衆咸駭服父少保喜曰張氏種德積善後世必有大吾閭者其在此兒乎十歲能屬文出語不凡同舍生歛社畏避時少保之子唯公一人公晝則幹蠱夜則讀書積日累月身脩學成猶未忍離親側少保屢勉之年二十始入縣庠居無何試藝優長升補泮宮方舍法盛行游學之士肩袂摩厲公偉然傑出冠於諸生郡將尚書俞公棗一見異之期以公輔大觀四年



褒然為舉首貢入辟雍繼升太學方是時承平日久京都以侈靡相尚士之不悅紛華盛麗者十無一二公獨深居簡出潛心大業至不知飢渴寒暑流輩初易之久而見其志趣益篤問學益精每羣試輒處上游乃更推服質問疑義或摳衣就弟子列四方人士聚於成均無慮數千人語學行之懿必以公為稱首政和三年試內舍第一明年以優等較定試上舍主文尚書張克公見公程文稱歎不已謂遠於經術遂復擢為第一是年四

月七日天子御崇政殿賜上舍及第釋褐授承事郎玉  
音宣諭張綱係三中首選可特除太學官臚傳既下在  
廷歎仰蓋一時異恩前此所未有也宰相蔡京與張克  
公不協故特抑之後數月始除辟離正當時好事者以  
本朝衣冠盛事編次為圖載公三魁之美搢紳榮之五  
年除國子正蔡京方用事必欲使天下士盡出其門朋  
附之徒有朝處奧潔而暮躋華要者唯公守正不阿初  
賜第旅進一見而已絕迹不再往京以公為時第一流

人意欲羅入己黨頻遣所親致委曲且曰倘能屈意相從簪橐可立致公曰富貴在天蔡氏其如予何京聞其語大銜之徽宗皇帝屢欲擢用公京但於學官中時一改除勉從上意爾公久在學校諸儒敬服既橫經上庠以師道自任循循訓迪卒歲忘倦六年八月除辟廳博士一日忽有旨召對便殿公自謂起踈遠荷聖主特達之知思竭忠言冀以感悟淵聽既見上首論朝廷用人當分別邪正以謂方今之患在於君子小人混淆而莫

辨陛下倘奮乾剛擴離明詢之以言試之以事稽諸古  
訓格以僉言則邪正不啻黑白之易見不然將恐小人  
得志無所忌憚或苟且以害成或邀功而生事其禍有  
不可勝言者又論奢侈之弊以謂民之化上捷於令陛  
下履豐亨豫大之期固常憂風俗侈靡而下戒飭之詔  
矣然而背本趨末日甚一日流蕩而不返臣愚以謂陛  
下不率之以躬行之教未見其能革也陛下誠能以祖  
宗躬行之教為法其不合於祖宗者一切去之則天下

雖大有不難化者公儀貌端偉音吐洪暢所言切中時  
病上為之改容嘉納獎諭數四除秘書省校書郎蔡黨  
聞之大怒益欲逐公而未有間也七年磨勘轉宣教郎  
明年竟為蔡氏所擠韓駒張恣輩凡與公厚善者二十  
一人俱在遣中得主管成都府玉局觀以歸宣和二年  
五月依元豐法罷宮觀八月磨勘轉奉議郎三年閏五  
月再除秘書省校書郎兼脩國朝會要明年兼校正御  
前文字上方崇儒重道博彙羣書公洞貫九流多識竒

字校讎天祿是正魚魯功實多焉朝廷議遣童貫蔡攸  
宣撫朔方公上疏極論不可出師之狀且引易大君有  
命開國承家小人勿用必致亂邦之語書奏為持權者  
沮格不報公憤惋久之繼傳郭藥師歸順蕭后納款收  
復燕山捷音踵至在朝莫不相慶唯公憂懼益深至忘  
寢食暨遭靖康之變人皆謂公有先見之明十二月除  
著作佐郎五年八月入尚書省為屯田員外郎十一月  
磨勘轉承議郎初王黼秉政威權浸專公惡其為人雖

同僚以職事見公亦託疾不往周旋數年間竟不識黼  
之面黼憾之公在職年餘徽宗皇帝一日取班籍指公  
名謂黼曰此人馳譽文場行實相稱可與除近上差遣  
黼設辭障蔽竟不得遷七年六月改司勳員外郎九月  
磨勘轉朝奉郎十二月北虜渝平兵及畿甸公夙夜憂  
憤謂所親四方今國步阽危吾處下僚不獲與聞朝論  
然苟有可以効節者不敢不勉乃為書與父母訣獨留  
老卒垂二繩於梁間曰都城脫有不免與其辱於犬羊

之手不若就死於此於是乘城晝夜守禦四十餘日既解嚴有旨登城及一月例遣一官公曰主憂臣辱義則當然願可因此以幸賞邪卒不自言靖康元年三月遇欽宗皇帝登寶位覃恩轉朝散郎是時少保榮國以公久在圍城中音問不通積憂成疾公得家問即上章丐祠於是公為兩浙路提點刑獄公事陸辭之日上宣諭曰朕知卿不阿權貴恭守方嚴故授卿此職切宜為朕愛恤百姓公頓首受詔還家方浹旬復被召赴闕大



臣傳上旨欲除公橫榻公方迎醫就養額天有請辭甚  
哀切欽宗皇帝雅知公無兼侍特可其奏及聞二聖北  
狩張邦昌僭竊遂棄簪紱移病告老忽傳太上皇帝踐  
祚於南京詔至之日公病立愈自陳乞就職時浙憲已  
別差王翹矣建炎元年遇太上皇帝登寶位覃恩轉朝  
請郎駕幸維揚降旨召公赴行在所公以二親垂老力  
辭遂再除兩浙提點刑獄公事四年七月復除司勳負  
外郎公又固辭乃還浙憲紹興元年磨勩轉朝奉大夫

二年改除江東提刑是時戎馬初息民力未蘇公到官  
撫摩凋瘵惠恤鰥寡屬吏之贓污不法怠不舉職者悉按  
劾無少貸諸郡詳覆具獄躬親省閱必以情刑名或不  
當駁正之吏以舞文抵罪與夫民有寃而獲伸者非一  
自中原倣擾士庶或盡室嬰禍事既定往往立子為繼  
而於法不合承絕家財產坐此牒訴紛然公具奏乞將  
已絕命繼之人視出嫁女等法量許分給又鋪兵依條  
不許別役而無立定罪名公乃乞比巡附轄使臣私役

法一等科罪今皆著令寔自公發之凡州縣事有未便及民所願欲而未獲者皆罷行之不可槩舉統兵官王進駐池州完暴放肆凌蔑州郡有曹官以小事忤進遂釘其手於門上聞其事詔公體究時國勢未安諸將皆有輕朝廷心公到池陽進擁鐵騎數百突至輜車之前衆頗失色公不為禮入傳舍廉問得實立進數責之進叩頭伏罪自是不復越紀律公巡歷所部訪民疾苦未嘗休息迄冬奔馳道路居鄱陽公辭止數十日而已凡

為民去害建利唯恐不至席未及暖而江東九州無遠  
梗吏歛手不敢為非公在任及所過州郡餽送絲毫不  
受下車之初解舍所列器皿謂之併淨例皆一新公即  
令公帑緘封以俟後政所用唯隨行瓦木之器比去悉  
以所緘封者揭於榜歎曰民之困弊未有甚於此時而  
有司供帳視承平不少減吾忍用之哉至今士大夫相  
與語廉節者多舉公此事為師法太上皇帝方銳意於  
治二千石刺史之賢否靡不周知一日顧宰臣盛稱江

東最績遂以左司召公入對極論天下之事上擊節稱賞有大用之意公又言監司守臣數易之弊及州縣獄囚瘐死吏無考課法上嘉納之三年正月兼中書門下省檢正諸房公事二月除起居舍人是時北虜漸退川陝屢捷公恐中外苟安上疏乞益嚴邊備又乞舉行仁宗皇帝故事諸路帥守替日各令條列利害五事以上畫一具奏後皆施行五月除中書舍人公文思敏瞻凡得詞頭即時具草未嘗稽留方多事時書命填委公洒

翰泉涌事辭俱稱玉音稱獎謂比年詞臣鮮能及之自  
擾攘以來史筆未修雖詔論譔而秘書權輕闕會稽失  
公建言乞依祖宗故實委大臣兼領史事即日詔宰臣  
呂頤浩兼修國史至今遂為定制北虜初議和朝廷數  
遣使而虜情叵測廷臣以預選為憂公獨奮然請行大  
臣以公姓名進上曰張某親老且詞命正有所賴朕將  
委以北門之任矣公聞之感泣未幾榮國病甚乞外詞  
章十餘上不許遂賜告迎侍還鄉繼被旨趣歸甚峻是

冬還朝供職四年正月兼詳定一司勅令尋除給事中  
公由江東憲蒙召擢不二年間致身法從自以遭時遇  
主古人所難知無不言未嘗有分毫顧望意是時獻言  
者交章公車每付給舍者詳公曰祖宗成憲具在患不  
能舉行捨是而一切紛更何益自非卓然可用皆報罷  
或挾勢以強公卒莫能得大將有以軍中田產乞不起  
稅為言者朝廷欲從其請公毅然以為不可先是推恩  
元祐黨籍子孫許其自陳一時有司失於限制來者不

止公建議以崇寧初年所定碑刻九十八人為正又軍興以來小人乘時召亂經涉五年而仇怨告訐連蔓不已公上言乞截日蔽囚後有告者勿受庶以廣好生之德事即施行而潭帥申請委曾焚劫為首之人請論如法公復奏駁上卒從公議是時所在狴犴填溢一旦釋遣皆洗然自新為良民矣公又論舉將帥修戰艦淮南官冗軍糧闕乏科數弓料私置稅場及宿衛單寡等皆一時急務舊法應庶官至中大夫止若太中大夫非侍



從不遷謂之止法宗室有特旨轉行太中者公因此上  
言崇寧大觀以來士風不競叨官竊寵不循資序遂至  
國紀大壞陛下慨然念治將欲大變其俗故前日冒濫  
之人大者追奪小者審量有識之士方竊欣幸以為自  
是遵守祖宗之法今乃復違舊章超遷官秩臣所未諭  
上聞公言即寢其命宣政大臣有上遺表章復官推恩  
者公力疏其諂諛誤國之罪以駁之舊相或以生計自  
言乞借撥官田公引子產辭邑事以告於上貴戚近侍

凡所干求苟涉僥幸一切奏罷之人皆服公不畏強禦  
公在省闈二年凡命令有不當輒封還詆斥權貴盡言  
切直無所回避風采振一時上亦知公忠赤屢見褒美  
人以公居閒恂恂似不能言者而臨事慷慨如此益知  
所蘊蓄與常人殊因為之語曰張公論事有回天之力  
今信然矣張俊以宣撫使屯江上遣營卒持書至江州  
瑞昌縣卒怙俊勢見令踞視出慢語且與獄囚有疑似  
之迹令郭彥參械繫之俊訴於朝彥參坐免官公言近

時州縣之吏多曲意迎合獻諛當路至不隨流俗能為  
陛下奉法遵職者蓋寡如彥參者謂宜有以崇獎之今  
乃坐免何以為剛直之勸時俊典領重兵專制閩外朝  
廷每務優假疏既上在列駭愕權要有為俊地者公  
由是不能自安俄解職提舉江州太平觀朝野無不惜  
其去五年二月除徽猷閣待制七年三月再任於江州  
太平觀初少保以公恩封位至五品公既奉嗣歸養脩  
盡子職每歲時燕集或賓客過從公腰金侍立捧觴上

壽鄉人以為榮是年六月少保卒公執喪哀戚甚勺飲不入口杖屐能行人謂曾閔不過也九年九月外除十月差提舉亳州明道宮十一年四月轉左朝散大夫公自轉正郎以朝廷多故十載不叙年勞至是有司始檢舉為十二年至十四年凡兩請奉嗣皆提舉亳州明道宮十一月磨勘轉左朝請大夫十六年丁榮國夫人憂方強仕時每念親闈無手足之助暮年乃克躬色難之養溫清甘旨未嘗廢離及榮國寢疾公屏去家事專務

醫藥衣不解帶者累月居喪衰癯不自勝執禮逾於少壯十九年三月服闋五月差提舉江州太平興國宮二十年轉左朝議大夫二十一年八月再任提舉江州太平興國宮二十二年公生七十年矣遂引年辭祿十二月得請轉左中奉大夫依前徽猷閣待制致仕公任司勳郎官日秦檜以酬賞事屬公公據法以為不可檜甚怨之及檜當國公絕不與通問一日檜謂公舅氏李朝正侍郎曰張夕拜正而不他吾所心服闋不聞問鄙我

也李移書道其語公不答閱歲檜數溫前語色頗厲朝  
正復相告檜方專權睚眦必報大臣誅殺流竄者踵相  
躡士大夫重足一迹日虞禍及公得朝正書曰吾已無  
求於世矣京黼尚不為之屈况檜乎檜由此益怒至是  
乃祈謝事以卒素志二十五年十月檜死太上皇帝躬  
覽萬幾圖任舊人共政不閱月召公落致仕赴行在所  
制曰七十而歸政古之道也古之人亦惟曰無以事勸  
耆老云耳然至於壽考康寧抱道懷德而諳練治體者

則賜之几杖之言詢事不懈夙夜安有聽其引年而去不知寶貴如我今者具官某時之者傑朕所體貌給事東臺迨茲二紀而凜然風聲猶著措紳之間不為朕留以老自請亦既許之矣載惟老臣之居國譬言如合抱之喬木封植成材豈一日積知材不顧人謂朕何是用起之丘園引對便殿使朕不失貪賢之美而卿有不忘君之忠豈不休哉安得來副我虛佇公以老疾為辭詔不允促行甚亟公不得已就道都人以公年耆望重久間

復出夾道聚觀爭先覩之為快衛事之舊人識公者更相告語咨嗟歎息之聲洋溢朝路公對便殿太上皇帝喜見顏間曰卿閒居已二十二年矣前屢趣卿者正欲速聞謹言耳首問當今治道之所先公敷奏甚悉因論比年公道不行之弊亟蒙睿獎對數刻乃罷即日除吏部侍郎方是時盡逐秦黨號召天下名德之士咸處班列不數月間自執政至侍從臺諫多公門人如魏良臣周葵湯鵬舉凌哲皆自公昔所論薦一時服公知人之明



且歎其為當今舊德也秦檜當軸二十年士大夫不登其門者幾人唯公七任宮祠退藏密深未嘗以一毫干之而檜亦不少假借比公再登禁塗秦門舊客各欲詭脫蹤跡往往極口談檜之惡而公反不出一語或問之公曰今之因革惟公道是從豈以譎譎求勝哉由是更服公德量之不可及也十二月兼給事中二十六年兼侍講初講詩闕睢一篇因后妃淑女之事歷陳文王用人以致規諫之意上褒諭再三且曰久不聞卿博雅之

言今日所講析禮詳明深啟朕意公乃奏比年舉子鮮  
知經術宜令詞賦之士兼隸一經如紹興十四年故事  
庶免偏廢之患上深然之明年省試畢事遂施行尋權  
工部侍郎二月權吏部尚書自祖宗以來立公私贓罪  
三等之法以戢貪殘之政暨秦檜為相復增民事一條  
凡麗於民事永不得注親民差遣公曰守倅令佐親民  
之官苟有所犯未有非民事者錮人聖世豈不重可惜  
哉亟奏罷之公晨入坐曹事無大小必躬自鉤考發擿

按治吏無所容其姦士大夫希恩雪罪有數十年不決者公悉以法訂正可與者即奏與之因進故事極言銷金之費異時論事榻前上復以此為問公口陳為患甚大宜速禁止遂下詔如公言三月再轉左中奉大夫五月大金賀生辰使敬嗣暉入境詔公館伴既接見嗣暉謂其副曰我自幼聞此公姓名今尚在邪由是執禮甚恭故事觀潮浙江坐定潮至嗣暉舉前輩詩數十首以問公應答如響中使入奏上喜甚及事畢褒寵異於常

時蓋嗣暉在虜中號知書虜以秦檜死選擇而使之欲以覘吾國知公德望素著辯論不可屈故卒禮而去無或違者會彗出東方詔士庶實封陳言其間貪競之徒以權貴人死意朝廷必欲盡變其所施設故其言不擇是非雜然並進公亟上疏謂求言不可不廣聽言不可不察舉而行之尤不可不審蓋恐踈遠之人銳於納忠有強出新意而致衝改祖宗舊法者有取便一時而行之既久不能無害者有貪蠲復之名而不以用度較之

致州縣不免暗取於民者上曰數日來朝臣獻言多矣  
唯卿所陳之言獨合朕意大臣用心正當如此明日宰  
執奏事上宣諭此語知公才堪丞弼遂除公中大夫參  
知政事公入謝因奏臣待罪政府不欲令子弟仕於朝  
乞罷男堅國子簿見任上曰卿深鑒權臣私親之弊首  
變前轍朕甚嘉之特依所乞厥後大臣為子弟引嫌丐  
罷者相繼有請遂以為例初秦檜久擅政柄以嚴刑峻  
法鉗天下之口太上皇帝慨然總覽盡去苛刻之政自

爾詔令之下無非寬恤民力公建意以頒降重複官吏  
奉行不虔恐民庶不能通知乃令有司看詳取其切於  
利民者得八十餘事止標大意及降旨月日其間繁文  
一切削去奏乞鏤版宣布中外仍令州縣揭諸粉壁於  
是天下曉然皆知吾君之德意矣公在政府孜孜庶務  
憂國如家錢穀甲兵之間或至廟堂必為之竭慮經畫  
至通夕不寐幸而得之則翌日以告丞相俾奏行焉未  
嘗自以為功而上亦深知士大夫無辜被罪竄斥遠方

有未還恩數者公奏事上前便言不已每蒙開納薦  
舉人才必參公論皆曰賢矣然後剡章兩省侍從由公  
延譽而被擢用之人甚衆公未嘗語人而其人亦卒不  
知為公所薦也公自參機政天下事多所建明更化以  
來所以維持紀綱法度可以數百年猶蒙其功者公實  
有力焉至二十七年九月公謂家人曰吾貳政已暮年  
衰疾豈可久妨賢路宜出裝吾丐歸矣乃夜奏遲明懷  
至漏舍示同列遂留身乞辭機政上驚曰卿在政府宣

力甚多方切倚毗豈當捨朕而去確然不許公既退即  
挈家屬出私第示必不可留相繼章四五上累降詔遣  
中使宣押恩禮備至公力懇不已上已知公去意甚決  
曰卿先朝老臣出處皆可觀今之求去蓋欲全進退之  
節豈可以朕故令卿有不滿意然觀筋力尚壯尚為朕  
卧理一政而公文懇辭上曰比年執政無善罷者卿之  
行可謂勇退矣且大臣去國自有體貌此不可辭拊勞  
久之除公資政殿學士知婺州陛辭之日上復與公極



論異日為治之要已而曰舊德去朝相見無日因輦感  
不憚公再拜謝恩既下殿復宣坐賜茶慰免加厚公至  
浙江亭將登舟忽中使馳至賜御札一封通犀帶一條  
天語丁寧脩極恩寵縉紳歆艷以為近世初見也是日  
宰執侍從下至百執事悉會江亭叙別冠蓋相望填溢  
阡陌都人縱觀或繪為圖以比漢之二疏云公至婺州  
布宣天子德澤為政務簡易存大體至於事干休戚則  
必反覆詳審而不敢忽一方之民初未識公徒以公名

德之重更相戒飭勿犯公法自郡丞以至諸邑官吏翕然奔走率職曰豈可復以猥瑣上累我公神明公以獄者人命所係尤所加意每錄重囚必使升階立坐隅親加臨問察其辭色多得其情蒞事之初有大辟囚以疑奏讞得旨杖脊流配當決日引囚出則癯瘠若病者公命減杖數之半僚吏皆曰此勅斷也不可公曰主上寬仁好生哀矜庶獄某嘗親聞聖訓今此囚既以疑故宥其生矣脫或斃於杖下則如勿讞人主欲生一人而郡

守乃殺之尚可謂之承流化宣乎衆莫敢言本州歲以綾羅輸內庫自紹興以來逋負重積前官以屬官禁不敢丐免有司督責嚴甚公具奏一切蠲除之又乞增大禮買羅之直民皆被其賜公在郡祿令之外一錢不受或以謂例所當得前後相承莫有廢者公曰吾顧法如何未聞以例從事也食指猥衆用度不足至質錢以自給飭內外非飲食日用之物不得輒市於民婺出羅帛家人欲一見且不可仲春勸耕例攜妓樂公悉屏去燈

夕出游吏以故事告公亦罷之政務便民安靜不擾數  
月之間郡以大治公曰可以休矣遂再辭祿明年三月  
命下依前資政殿學士轉左中大夫致仕即日西歸資  
裝無浙東一物盡以錫賚之餘分給親族之貧者致仕  
官暨使臣合得俸祿悉罷去不請曰吾平生食君之祿  
多矣豈可復更尸素吏輩役於私室難以費蠹籩廩寧  
自給之食築亭池上名曰喜歸公自號華陽老人日與  
親舊游息其間又作詩以叙喜歸之情一時名士賡和

為軸公遭遇累朝晚年蒙太上皇帝擢與機政眷遇優渥雖一飯之間未嘗忘感戴之意晨起必注香上祝千萬歲每戒子孫曰吾老矣不能上報國恩汝曹其勉之至被疾猶諄諄道此語人皆謂公發於至誠然而二十九年七月以其子堅該恩叙封轉左通議大夫三十一  
年太上皇帝巡幸建康出京口公扶病朝行宮是時虜踐淮甸王師到屯江滸上見公慰勞周悉因語時事且曰卿在政府時屢講募兵之議有司措置失當今遂乏

用公奏述江淮形勢乞寬聖慮上問公體力增損授以藥方仍述脩養之法恩意款密人皆屬目焉主上登極首訪公安否明年十一月召公赴闕公具奏力陳兩經致仕衰病難支上察其由衷詔曰張綱一時老成朕所渴見已令趣召乃以耄老為辭重違雅志可從所請令所在州軍常加存問仍賜羊酒郡守備禮委縣令入公里致詔特異之恩一時鮮儷世以為寵乾道二年正月感微疾踰月疾良已甲午之夕與家人笑語如平時遽

命取水浴體浴畢安臥三問夜如何至二鼓忽舉手加額三叩齒遂薨於正寢三日而斂手足和柔膚革如生享年八十有四官左通議大夫職資政殿學士爵丹陽郡開國公食邑二千二百戶實封一百戶遺奏上聞天子嗟悼輟視朝一日詔贈左光祿大夫恤典皆如式公始以經術大儒為上舍第一釋褐即官上庠自正至博士凡三遷時鼓笥踵堂閤閤秩秩盛於唐漢公講論經旨研窮理窟人人渙然冰釋

闕





--	--	--	--	--	--	--	--	--

恩官基之弟塾公載念曾祖後猶有未任者又以郊  
恩官其從姪鉞自叔父以下由公而仕者凡六人公媚  
適溧陽進士談思文實榮國所鍾愛復奏補甥檉將仕  
郎公始輟妻之封及祖母輟子之祿及叔父輟孫之官  
及羣從甥姪至薨沒時曾孫數人皆未官嗚呼非孝義

過人安能若此建炎初六飛南渡江浙雲擾公侍二親  
奔竄山谷鄉鄰之避寇者知公所在爭趨附之曰此公  
純德孝行可以動天天必佑之冀賴餘庇以免由是相  
從者數千人晝伏夜行周旋於烟塵矢石間凡數月卒  
獲無虞間有捨公而出他途必遇寇掠前後數十無免  
者一日公與羣衆隱大林中虜騎遠林謹譟聲勢甚迫  
衆大恐遷徙紛亂或啼哭失聲閤然不可遏正爾惶惑  
忽大風起飛沙折木震動林藪移刻而止虜騎尋引去

是日微此風則虜聞人聲無噍類矣人皆以為公德行  
所感厥後中朝士大夫流散南徙狼狽於道有至公卿  
者不以在亡為辭必厚館之或經歲乃去性儉約自入  
禁闥贊化鈞首尾踰三十年家無金玉之器室無衣帛  
之妾凡世之聲色玩好一無所著在政府時每解衣入  
見所服縑素無不歎息鄉人衣冠新異者不敢服以見  
公有為不善寧受辱於有司惟恐公之知也公居依山  
而田瀕湖每歲夏潦山水湍激悉為巨浸有勸公增置

良田者公曰先世以此貽子孫倘可保守足以資伏臘豈可廣植膏腴以損子孫之志哉故自微至貴田不加益祿廩之餘推以賑貧無吝色每蓄善藥名方人有疾手自施予鄰里死者賙其棺槨歲穀熟必損衣食之費增價糴而藏之至春則減其值以濟之絕一方賴此免於饑饉流徙者不知其幾千萬人也紹興十六年丁滎國憂有穀千餘斛盡以貸鄉民之無告者既而焚券樞前曰世俗以厚緇黃為孝於親孰若惠貧乏以酬親志公

所居宅南甘露降於衆木之上。一歲凡三見穰穰如貫珠。庭前雙桂枝生連理。寢室之後復產紫芝。又有羣鶴數百回翔寥廓下視所居。公祝曰：胎僂見臨願示丹頂。俄有二鶴垂首簷檻飛舞自獻。人皆異之。先是公夢遊一官府。殊庭虛寂非人世。比夢中以為異日當居於此。後十餘夢宛然如一。公薨之月族弟統夢至其所與公言同。門設綠牌而無字。有告之者曰：俟張公至則書此額矣。考公平生所踐履則知身後所歸宿。夫何疑哉。公

娶同邑徐氏贈新安郡夫人建炎四年卒男二人堂右  
宣義郎前公二十年卒堅朝散大夫直寶文閣知泉州  
嘗歷御史國子太常簿孫四人蚤承議郎新通判信州  
添迪功郎早卒鑿迪功郎池州貴池縣主簿鎬從事郎  
新平江府崑山縣主簿堅蚤皆中進士第種學積文能  
世其家鑿嘗薦名禮部孫女六人適士族曾孫男女八  
人尚幼乾道二年十一月己酉葬公於家北古觀基之  
原從治命也公以全德碩望遭遇四朝言聽計從澤及

天下克保富貴壽考此然為世重臣訃音流傳學士大  
夫暨閭巷之人無問識不識舉皆痛惜流涕蒙公恩者  
至畫像而祠之公平生不求赫赫之功唯以道德仁義  
自任誠心守之老而不衰此其所以大過人者真所謂  
古之遺直歟公之子堅欲上公行實於朝以丐易名之  
典俾箴叙其本末箴出入公門三十年矣知公出處最  
詳輒以所聞見紀其實以授公之子不敢有加焉庶幾  
議謚勒銘有所考信以傳不朽視質諸夏無且畫工為



無愧云謹狀乾道四年三月某日通直郎大理寺丞洪  
箴狀

先君性嗜學壯歲讀書至忘寢膳自肄業上庠以至官  
中都著述無虛日任館職最久與一時名公賡和尤富  
建炎已酉金虜南渡犯浙東明年三月北歸所過焚剽  
無噍類先君方待浙憲闕居金壇倉皇挈家奔句曲之  
西館戴氏一夕虜卒至家人竟以身免去未一里而烈  
焰燭天由是數十年手澤悉為煨燼無餘迨戎馬息驚


魂猶未定而秦丞相當國士大夫以文墨賈竒禍斥逐  
流放踵相躡於道先君念太夫人年益高無兼侍秦又  
挾微嫌憾疑不附已常恐一旦貽親憂遂絕意辭翰嘗  
為大理卿譚公哀辭有士應知已用人豈法家流之句  
既出好事者口語藉藉幾為所醞釀因此愈自晦屏去  
筆硯二十餘年或諉以文字之職一切力辭遇勝日袖  
手危坐命子孫讀古人佳製以寄幽賞秦相卒先君蒙  
先堯壽聖皇帝擢登政府旋再辭祿以歸時年已七十

六間居又八年而即世晚景多病頗近藥石雖時時歌詠太平然精勤刻苦不能如疇昔矣堅不孝遭大罰號慕之餘哀集遺文以類編次僅得外制二百二十二表疏九十八奏劄六十八故事十九講議十九啟八十四雜文七十六古律詩二百三十九樂府三十四釐為四十卷以先君自號華陽老人目之曰華陽集集中有宣政靖康間所作詩文數十篇皆掇拾於殘編斷簡之末或親舊口所傳誦十不存一二惟尚書解三十卷乃先

君為學官日所作講議訓諸生者閩士集而成書別本刊行嗚呼先君力學起家不幸遭兵火畏權臣故文章之傳後世者止於如此敢摭其實載集尾以俟立言君子為之叙乾道三年九月朔孤子堅泣血書

先大夫平時刻意辭章老且勿倦不幸厄於建炎兵火而殘編斷簡得之煨燼之餘又不幸沮於秦丞相以深文箝天下舌而片言隻字莫敢出諸口比及秦亡而大父已告老然遇佳時勝賞猶時時技癢發於吟詠故身

後裒積之文僅如是而止先叔寶文久欲鋟之木而志  
勿遂蚤假守秋浦之明年郡事稍閑因取所編復加訂  
正以成先叔之志云紹興改元冬十二月孫朝奉大夫  
權知池州軍州兼管內勸農營田事蚤謹書



華陽集卷四十